

JEHOVA-JAIRE ¹

 Ha muine. Ye ki kolo yende, ya kukuta hape busihu boo. Mi ki mbuyoti yetuna ku na, kutaha ku to ambola ku mina ka za Mulena luna Jesu, Yo Ni ziba hande kuli buñata bwa mina mwa muziba, kamba Ni sepa kuli mwa ziba, ka kuswalelwka kwa libi za mina ni—ni ka nzila ya sishemo sa Hae, ku mina. Mi cwale Ha kenyen ku mina, busihu boo, buñata vwa sishemo sa Hae. Ha lu ta zwa mo, lukone kubulela, sina bani bene bazwa kwa Emausi kuli, “Lipilu za luna ne li cisa mwahala luna, ha Na ambola ku luna mwa nzila.”

² Cwale, kakusasa ni kakusasa, Ni lumela kuli bana ni—ni—ni—ni muuna ya ambolisa sicaba sina cwalo. Bo. Vayle fa bana ni—ni tuto, mukwa wa kualaba lipuzo ka ona ni kubulela ka Mañolo. Kana zeo licwalo mwa muyaho moo? Ona mwa muyaho moo, kakusasana. Mi haiba kuna ni ya lukuluhile, ni bakutazi babañwi, kamba babañwi cwalo, baba tabelia kupota, kupalañi, mutu kaufela u amuhezwi. Mi Muzwale Vayle yena ki muluti ya bunang luli. Luli, una ni tuto yekwanile luli.

³ Mi kabakaleo, Ne ni bulezi zazi leliñwi, Ni—Ni lakaza kuli kambe Ni itutile. Ni na ni kuitusisa linguli, inge nto isili, fa kutatulula, mwa ziba. Ha ni si ka ituta kuli ni tatululange kufita fateni. Kono kanti, kamba ka mayemo asili, Mulena wa ni tusanga kukondisa.

⁴ Mi kacwalo Na hupula, nako yeñwi nekuna ni—ni muuna mwa Mañolo, libizo la hae neli Joani, mi ndatahe neli muprisita. Hañata, neba likanyisa sa na eza ndatabona. Kono nana ni liñusa luli; na lukela kuzibahalisa Mesia. Mi cwale kambe nakedi sikolo sa nakedi ndatahe, ne ba kali, “Cwale, wa ziba Muzwale yomunde wa *Kuli-ni-kuli?* Yani ki Mesia fela,” ne se ba bata kumu kenya mwa litaba zeo. Kacwalo, mwabona, na si kaya kwa sikolo kaufela sa mufuta o cwalo.

⁵ Naile mwa lihalaupa, koo nailo ituta za Mulimu. Mwa lemuha mañusa a hae, ha yo kuta? Na si ka ituta. Naile ka myaha ye naini ya kupepwa, ayo kuta ka mashumi amalalu, akutaza likweli ze silezi, mi abulaiwa. Cwale lufumana kuli na itusisa... Naize, inge Bafarisi ha yo kuta, ni Basaduki, mi ki hali, “Oh, mina bana ba linoha!” Kona za na bonanga mwa lihalaupa; linoha, nto yemasila mi ye butali, ni kalembeshwa. Mwabona?

⁶ Cwale yomuñwi wakona kubulela kuli, “Kiñi, mina buungululwa bo bu fipeliswa,” kamba nto yeñwi. Kono yena...

⁷ Kono, mwabona, na sa zibi manzwi a kuitusisa, kacwalo abulela fela kuli, “Mina bana ba linoha,” kona za na bonanga mwa lihalaupa. Ali, “Ki mañi ya mi lemusize kusaba buhali bo butaha? Musike mwakala kubulela kuli, ‘Luna ni, luba siemba se

ni siemba *sani*,’ kakuli Mulimu wakona kuli ku ona macwe aa,” ki lika za na bonanga, “kuli azuseze Abrahama bana. Mi silepe se si yendekilwe kwa mubisi wa kota.” Na ziba sa kueza kwa kota yemaswe. “Kaufela ye sa beyi miselo yeminde, ya lemiwa ni kunepela mwa mulilo,” kuli acise likota zemaswe.

⁸ Mwabona, liñusa la hae kaufela neli fela taba ya za taho, na li swanisisa. Batu babasina libubo ne ba li utwisisa. Mi cwale ki ha... Ni sepa kuli linako zeñwi ikona kuba nto yende ya kueza kufita manzwi amatuna aa kaufela eba ituta batu kwa sikolo.

⁹ Cwale, ne lu liehile nyana maabani busihu, kacwalo lu lika ku mi lukulula fela ka nako, busihu boo, haiba lu kona. Mi Ni sepa kuli Mulena hana kulumeleza kuli inele hahulu busihu boo, fa situwa sa likapa se, kacwalo luka lumela fela mi—mi ni kulika ku Mu sebeleza, ka bunde bwa zibo ya luna.

¹⁰ Cwale ha lu yemeñi halunze lubala Linzwi la Mulimu, halunze lubala cwale mwa Buka ya Genese. Mi lukala ka kauhanyo ya 22 ni timana ya 7, kubala ni 14 hamoho.

Mi Isaka abulela ku Abrahama ndatahe, mi ali, Ndate: mi yena ali, Ki na Yo, mwana ka. Mi ki hali, Amubone mulilo ni likota: kono ikai ngunyana ya sitabelo?

Mi Abrahama ali, Mwana ka, Mulimu uka iponela ngunyana ya sitabelo: kacwalo bayo bababeli cwalo hamoho.

Mi ba fita fa sibaka sa na mubulelezi Mulimu; mi Abrahama ayaha aletare fateni, ni kuyala likota ka swanelo, ni kutama...mwana hae tota, mi amu lobaza fa aletare fahalimwa likota.

Mi Abrahama aotolola lizoho la hae, ni kunga tipa kuli abulaye mwana hae.

Mi lingeloi la MULENA la biza lili mwa lihalimu la li, Abrahama, Abrahama: mi yena ali, Ki na Yo.

Mi ki hali, U si isi lizoho la hao ku mwana, niheba kueza kubeya...fahalimwa hae: kakuli cwale Ni ziba kuli u saba Mulimu, ka kubona kuli u hanisize...ha u si ka hanisa mwana...hao kuna.

Mi Abrahama ainula meto a hae, ni kutalima, mi abona kwa mulaho wa hae totolo ye swasizwe mwa sicacani kwa manaka: mi Abrahama ayo nga totolo, ni ku italeka kuba sitabelo...bakeñisa mwana hae.

Mi Abrahama abiza libizo la sibaka seo Jehova-Jaire: sina mo ku sa bizezwa ni kacenu, Fa lilundu la MULENA ku ka iponelwa.

¹¹ Halu i namiseni litoho za luna fa nako nyana ni kufa tapelo.

¹² Ndata luna yakwa Lihalimu, lu bulelewka ki Linzwi le, ili yena Mulimu, kuli, “Tumelo itaha ka kuutwa, mi kuutwa fela

Linzwi la Mulimu." Mi cwale, Ndate, lu lapela kuli U sele kuluna tuto tuna ya palo yee, kuli lukone kuituta ka mo lu bulelezwi mwa Bibele, kuli, "Lika zani kaufela mwa Testamente ya Kale neli mitala ya kuli lubone." Ku baba utwela pizo ya Mulimu, ba fuyozwi. Baba i hana, ba kutilwe. Kacwalo lwa lapela, Ndate, kuli lube ni kutwisiso, busihu boo, ka sinulo. Mi Moya o Kenile u patulule ku luna lika ze lu ama mwa lizazi lee, lipatilwe kaufela mwa kunutu tuna ye ya Mulimu yebile teñi kuzwa mutomo wa lifasi. Kakuli lu kupa ka Libizo la Jesu. Amen.

Mwa kona kuina.

¹³ Ni bata kuambola fa tuto, haiba Mulena alata, kuzwa fa munahano wa kuli: *Jehova-Jaire*. Linzwi leo litalusa kuli "Mulimu u ka Iponela sitabelo."

¹⁴ Mi lu ambola za Abrahama, mi ye neli ka nako hana sweli kubata mwana wa sepiso. Kuli lube ni niti ya taba ye, lu ka kuta mwa mulaho. Mi mo neli mwa kauhanyo ya 22. Lu bata katalima mwateni hape; Nina ni Mañolo nyana e Ni ñozi fa, e Ni tabla kuswanisisa teñi, haiba ku konahala. Mi Ni bata kubulela ka ona, mi Ni bata kukalela mwa kauhanyo ya 12. Lu ka kuta kwa mulaho lufumane kuli mutu yo neli mañi yena Abrahama, mi cwale ni—ni kuli nekutahile cwani kuli Mulimu amu kete.

¹⁵ Lu ziba kuli sepiso ne ifilwe ku Abrahama ni peu ya hae mwa mulaho wa hae, mi ki kakuba fela ku Abrahama haluli bomuca sanda ni yena kuya ka sepiso. Cwale Abrahama nana ni peu, mi peu, eeni sha, neli, nana ni peu yeñata, lipeu, kono nana ni Peu iliñwi yeo sepiso neifilwe teñi. Nana ni Ishimaele; mi kasamulaho wa kushwa kwa Sarah, anyala musali usili mi apepa bana ba bashimani ba sebene ka yena lu sa bali basizana; mi kaufela bona ki peu ya Abrahama, kono haili... lipeu za Abrahama, kono haili Peu ki yona yene na ni sepiso. Mi Peu, kaniti, ki *tumelo* ya Abrahama, yana nani mwa sepiso ya Linzwi la Mulimu.

¹⁶ Cwale Abrahama, lu fumana cwana, kuli...ha bonahali konji ha lu mu fumana mo mwa kauhanyo ya 12. Kauhanyo ya 11 ya Genese, lu fumana kuli bo ndatahe ne ba zwelela kwa Babilona. Mi Abrahama neli fela mutu wa fela fela, yaswana fela ni wena kamba Na, kamba mutu usili fela. Mi na sweli kuamuhela, nitaluse, zelukona ku nahana kuli, ku supala. Nana ni myaha ye sebente-faifi ya kupepwa. Na nyezi kaizela hae. Libizo la hae neli Sarah. Mi libizo la hae cwale, eeni sha, ne si Abrahama, neli Abram. Mi—mi musali neli Sarai. Kacwalo lu fumana kuli neli mwanana ka myaha ye lishumi ku muuna, ili kuli yena neli sikisite-faifi, mi muuna neli sebente-faifi ya kupepwa.

¹⁷ Bona luli, nali njimi, ya na pila mwa musindi wa Shinari mwani, mi napila bupilo bobu bunolo fela. Yena—yena na zwelanga kwande ka nako ya musihali, ku yo izumela lifolofolo za hae mwa mushitu, ni kuyanga mumawa, mi na pila bupilo bo

bucwalo. Ali muuna fela ya ishuwile wa fela fela, nekusina sika sa buipiteli ka yena. Kono zazi leliñwi, Mulimu a mu biza. Kona zene ezize shutano, fani Mulimu amufa pizo.

¹⁸ Mi cwalo kona mo kuinezi kwa bupilo bufi kaufela. Si lwala Mulimu. Ha ki mo ezeza; ki sa eza Mulimu. Mwabona? Mu li, “Ni batile Mulimu. Ni batile Mulimu.” Wa fosa. Hakuna mutu ya batanga Mulimu. Mulimu ki yena ya batanga mutu. Mwabona? Ha ki wena ya bata Mulimu; ki Mulimu ya bata wena.

¹⁹ Jesu naize, “Ha ki mina mu Ni ketile, kono ki Na ni mi ketile.” Mwabona? Kona kuli u ketilwe haisamba lifasi litomwa, kusi cwalo no si ka ketwa nihanyinyani. Na tile fela ku to liulula libizo leo. Mi be mabizo abona kaufela a si ke kufumanwa mwa Buka ya Bupilo... kusika tomwa kale mutomo wa lifasi, ki bona fela baba ka yo fumaneha kwani, nihakuli cwalo. Mwabona? Ne mu ketilwe ku Yena kusikaba kale mutomo wa lifasi. Fani Ngunyana ha iketwa, mwa ketwa ni Yena, kusikaba kale mutomo.

²⁰ Mi mu cwalo, sina mo ne Ni bulelezi maabani busihu, u kalulo ya munahano wa Mulimu. Mwabona, yeo kona nzila fela inosi yokona kuba wa Kuyakuile ka yona, mi kona fela mukwa wa Bupilo Bobusafeli kihona. Kuna ni fela mufuta ulimuñwi wa Bupilo Bobusafeli, mi yani ki Mulimu. Kacwalo, ku felile, Ki yena Anosi fela wa Kuyakuile.

²¹ Cwale lu fumana kuli Abrahama nana ni sibaka sani. Mi Mulimu, mwa Testamente ya Kale, aeza ka mifuta ni miluti, kubonisa sa Na ka eza.

²² Cwale lu fumana fa kuli Mulimu na ambozi ku yena. Mi taba yetuna, kasamulaho Mulimu amano mu biza... Pizo ya na file Mulimu neli pizo ya buipiteli. Kono, ibo, ne i si ka sitatalisa Abrahama, nekusina nako ye cwalo. Na nza ziba kamita kuli neli Mulimu. Yeo ki nto yetuna. Mi...

²³ Lipizo za Mulimu li ipitezi; hakuna lika za nama ku zona. Mulimu unganga za nama ni ku li sebelisa ka buino bwa nama, kono haili lipizo za Mulimu ki za buipiteli. Bibebe ibulela kuli, “Linpo ni lipizo ha litokwi ku libakela.” Mwabona, li likisizwe kale ki-ki Mulimu.

²⁴ Cwale lu fumana kuli, ku se, cwana Abrahama amano bizwa, a utwa linzwi la Mulimu, mi A mu bulelela nto yeñwi yene bonahala kupala luli. Yena ka kuba wa myaha ye sebente faifi ya kupepwa, musala hae ye sikisite faifi ya kupepwa, yeo neika mubeya ka myaha ye mashumi amabeli kasamulaho wa buino bwa basali, mi apila ni yena kuzwa kwa busizana bwa hae. Ne basina bana. Mi, kanti, a mu bulelela kuli ne ba kaba ni mbututu, mi ka yena mbututu yoo lifasi loote, linaha zoote, nelika fuyolwa. Cwale yeo ki taba yenca.

²⁵ “Mi Abrahama,” Bibebe ibulezi cwana mwa Maroma kauhanyo yabu 4, “asika sitatala fa sepiso ya Mulimu ka ku salumela, kono atiya, inza fa tumbo ku Mulimu.”

²⁶ Nakona ku nahana fela . . . Kakuli, Sarah, sina ha Ni bulezi, na sa fitelezi buino bwa basali. Kweli ya pili, Na kona kunahana Abrahama ali, "Sarah, u i kutwa cwani, mulatiwa?"

"Hakuna shutano."

²⁷ "Kihande, kulumbwe Mulimu lu kaba ni mbututu, nihakuli cwalo. Lu kaba fela ni yona. Mulimu ubulezi kuli lukaba ni yena."

²⁸ Sarah, aluka tusokisi, ni kunga lindonga ni lipini, ni lika kaufela; aitukisa, ku itukiseza mbututu yoo, kakuli na ziba kuli na kaba ni yena. Mulimu na bulezi ona cwalo. Mwabona?

²⁹ Mwaha wapili wa fita. "U ikutwa shutano, mulatiwa?"

"Batili hakuna shutano ni yekana."

³⁰ "Kulumbwe Mulimu! Ikaba makazo yetuna kufita nako yapili. Mwabona, seli mwaha kasamulaho. Lu ka ba ni yena, nihakuli cwalo." Kiñi? Mulimu u bulezi cwalo. Ao kona mafelelezo. Mulimu ubulezi u cwalo. Luna . . . Mulimu u bulezi cwalo.

³¹ Myaha ye lishumi ya fita. "U ikutwa cwani cwale, mulatiwa?" Fa sa na ni myaha ye sebente-faifi, mi muuna seli eite-faifi.

³² Cwale munahane muuna muhulu ni musali muhulu baba cwalo, kacenu, inge baya kwa sipatela, ni kubulela kuli, "Dokota, lu bata kukala litukiso. Lu ka ba . . . ?"

³³ Mulimu u mi kupanga kuli mulumele lika zebonahala bukuba fokuñwi, kono U li eza ze lukile kamita. Mulimu . . . Mutu ya lumela Mulimu, luli uka eza ka bukuba, kwa lifasi.

³⁴ Mu nahane fela Mushe, yana lutilwe mwa lika kaufela za—za butali bwa Maegepita, toho ya mpi, ya—ya—ya—ya limpi za Egepita. Mi, ibo, za mutanda myaha ye mashumi amane kuituta zona, mi za tanda Mulimu myaha ye mashumi amane ku zwissa tuto yani ku yena, inge fela mo ne kuingezi lifasi ku li kenya ku yena. Myaha ye mashumi amane kufitelela, A mu pamula kumu beya mwa tuto, tuto kaufela, kuzwisa lituto za litapelo ku yena. Mi Amu katana kwa mulaho wa lihalaupa, mi aziba hahulu ka za Mulimu, mwa mizuzu yeketalizoho Fapila Mulimu, kufita za na itutile myaha yemashumi amane mwa libuka. Ku lukile.

³⁵ Mulimu ha zibwi ka tuto. U zibwa ka tumelo. Mu Mulimu a ambola ku yena ka za buipiteli. Mi ha ki nto kwa bukuba, linako zeñwi, yeo Mulimu a lu evisanga.

³⁶ Mu nahane fela kuli muuna muhulu, myaha ye eite ya kupepwa, amate, mupolofita ya mata kusaba Mulimu? Mi haili Fapila Mulimu ka mizuzu ye ketalizoho: kakusasana o tatama (Mwakona ku mu nahana cwalo?), ali muuna muhulu, mahaha inza lepelelafafasi sina *cwana*; toho ya hae ya sitenda inge ibenya; kota ye sikami sikami mwa lizoho la hae; musala hae

inza inzi apahami fa mule, ni mwana hae fa noka ya hae; inge ba zamaya mwa nzila!

“U ya kai, Mushe?”

“Ni ya kwa Egepita, ku yo hapa.”

³⁷ Mwabona, “kuyo hapa,” kuhapa kwa muuna alimuñwi. Zeo li utwahala bukuba. Kono, taba yateni neli kuli, na liezize, kakuli Mulimu na bulezi cwalo. Ao kona mafelelezo.

³⁸ Mi Mulimu ha bulela cwalo, kona fela zeliteñi ku zona. Zeo—zeo ki zona. Haiba Mulimu ufile sepiso, paheka moyo wa hao ku yona. Haiba ukona kuli lumela, paheka za hao... Haiba ha u li lumela, ina kwahule ni lona; li ka ku holofaza. Kono haiba wa li lumela, pila ni lona, li ka kuisa kwa tulo, ka niti fela sina lifasi.

³⁹ Cwale lu fumana cwana, kuli, “Abrahama na si ka sitatala fa sepiso ya Mulimu.” Mi ha na li wa myaha ye mwanda ya kupepwa, mi musali inzali wa myaha ye nainte, Na kona ku mu utwa; hasa kona kubulela cwale, uya a supala luli mi uba ya fokola, “Kihande, Sarah, mulatiwa, u ikutwa cwani?”

“Kihande, mulatiwa, Ha ni ikutwi shutano ni yekana.”

⁴⁰ “Haleluya! Luka—luka ba ni yena, nihakuli cwalo. Mulimu u bulezi cwalo, kona fela zeliteeni ku zona. Mulimu u file sepiso.” Na ize na “kolwa luli kuli Mulimu na ka eza sa Na sejisize.”

⁴¹ Mi cwale luipiza Peu ya Abrahama, Peu ya Hae ya Silena (isiñi peu ya Isaka), Peu ya Hae ya Silena, Kreste; ni kusitatala fa sepiso kaufela, ku kanana ni yona ni kubulela kuli ha i cwalo, ni kuiakanya mwa minahano ya luna? Na kakanya haiba lu Peu ya Abrahama haluna ni munahano o cwalo ku luna. Peu ya Abrahama ha i sitatalangi fa sika kaufela. I biza lika ze siyo, inge kuli liteñi, kakuli Mulimu ubulezi cwalo. Yena ki Mubupi. Wa kona ku lieza cwalo. U li sejisize, mi ao kona mafelelezo. Kona fela zeliteeni ku zona. Mulimu ha bulela sika, ao kona mafelelezo a taba yateni kaufela. Cwale, muhupule, na ibata... Nekusike kwa ba... Na bulezi...

⁴² Nto yeñwi yana mu bulelezi kueza, kuli aikauhanye ku yena cwale kuzwa ku bahabo ni sicaba sa habo kamukana.

⁴³ Mulimu, kuli abe ni muuna kamba musali, mushimani kamba musizana, kuli a Mu utwe, una ni kukauhana ili wena kwa ku sa lumela kaufela, yeo ki niti, kufitela u kauhana ka kufelelela kwa sika kaufela se si shutana ni Linzwi leo, ni ku Li lumela. Wena... Mulimu ubizeza kwa kauhano ye tezi.

⁴⁴ Ha ki shutano ni yeo ku zeliteeni kacenu mwa likolo za luna ze sweli ku lumanga bakutazi kwande. Li ba taza fela ka kusa lumela kwa mifuta kaufela ni lituto zesiyo mwa Mañolo kufita mufuta wa tuto yeñwi ye ba ipangela, ni kuba lumela kwande fa mayemo a cwalo. Ki kabakaleo ha lu ndondozi mifuta ya bo Oswald ni bo Jack Ruby, ni babañwi cwalo, hala naha kaufela. Swalisano i sweli kumiza na, kakuli luna ni mikopano ya

bulapeli ni bakutazi baba futumalizwe fela kufita baba lumilwe ki Mulimu, baba pepilwe sinca, babatezi Moya o Kenile, bana ba bashimani ba Mulimu babatezi Mulilo, bana ba Abrahama baba lumela Linzwi la Mulimu kuba yona Niti yeipitezi mi ha ki sesiñwi fela kwanda Niti, ya pazauhile, mi na yemi fa lisepiso, fapila sika kaufela, ni kulitalimafafasi, kuli ki Niti. Ki Linzwi la Mulimu. Ku lukile.

⁴⁵ Cwale Na ize, “Zwa mwahala lubasi lwa henu kaufela, kuzwa mwahala sicaba sa hao, lika kaufela, mi u Ni latelele.”

⁴⁶ Mulimu ha si ka cinca nzila ya Hae. Mulimu ki Mulimu ya sa cinci. Nzila yaeza Mulimu sika kaufela, nako yapili, Una ni ku sieza ona cwalo ka nako ya bubeli. Muhupule, hamukona kubona kezo ya Mulimu ka nako ifi kaufela, haiba Ha...Haiba—haiba mutu u latehile, mi U pilisize mutu ka mayemo a keto yecwani kaufela Ya ezize, Una ni kuina cwalo kamita ni keto yeswana. Hakoni ku i cinca. Mwabona? Yena ha feli.

⁴⁷ Luna lwa fela. Ni kona kuziba hahulu za kamuso kufita mo Ni zibela za kacenu. Kona mo mukona kuzibela ni mina za isaho kufita mwaha woo. Muziba hande za mwaha woo kufita mwaha o felile, kono isiñi Mulimu.

⁴⁸ Yena u petehile, hafeli. Liki kaufela Za eza li petehile. Hakoni kueza keto kacenu ni kueza yende kamuso. Yapili ya hae ipetehile. Kabakaleo, u lukela fela kupaheka moho wa hao fa sika kaufela Sa bulela, ki yona Niti.

⁴⁹ Mulimu na bizizwe nako yeñwi kuli abe ni keto, mwa kupiliseza mutu, mi ka mwa Na ezelize neli ka mayemo a Mali a suluhile a Yasina mulatu, mwa simu ya Edeni. Mi mutu ulikile lika kaufela mwa lifasi kuli apilise mutu, ka mikwa isili; ba yahile mileneñi, ba yahile matawala, babile ni tutengo, lituto, ni lika zeñwi kaufela, mi taba yateni kaufela ki bupalelwí kufelelela. Kuna ni fela nzila iliñwi yeo Mulimu apiliseza mutu ka yona, yeo ki ka Mali a suluzwi a Yasina mulatu. Ýeo kona nzila fela inosi. Boo neli buketelo bwa pili bwa Mulimu. Yena usiala ni bona.

⁵⁰ Haiba Mulimu akile afolisa mutu ka mayemo Akile amufolisa ka ona, Una ni kufolisa mutu yatatama ha taha fa sibaka sesiswana. Haiba Asike aeza cwalo, Na ezize ka mafosisa Ha kile aeza ka nko yapili keto hane ifilwe.

⁵¹ Yena haiba Uba ni keto, Una ni kuina ni yona kamita. Haiba Ha bi cwalo, kipeto Na bile ni keto ye fosahalile kanti sapili. Mwabona? Mi kimañi yakona kubulela kuli Mulimu na ezize keto ye fosahalile? Mwabona? Halukoni kubulela cwalo. Kacwalo Mulimu una ni kusiala kamita ni keto ya Hae. Kona kuli Ha eza cwalo, kipeto ki cona.

⁵² Kacwalo Na ize, “Zwa mwahala lusika lwa henu, lika kaufela, ku sa lumela kaufela ko ku zwelezi kwa Babilona kwani.”

⁵³ Kopano yetuna hahulu mwa lifasi neli Babilona, ha i to ongaonga mileneñi kaufela ku to itumela ka likute kwa mleneñi woo, mufuta wateni luli, milao ye kaufela ni lika zenca ze bonahala kacenu. Haiba mukile mwa bala buka ya Hislop yebizwa *Two Babylons*, ni zeñwi cwalo, ni kukutela mwa Genese, mu ka fumana kuli Genese ki makalelo, kona peu, mwabona milao ye kaufela ni lika zeñwi, ze beilwe hande mwateni.

⁵⁴ Mwabona, Bafarisi ba ba inuneka bene bazwile kwani, kuzwa ku musali yani ni mibisi ya hae ni zeñwi cwalo, ya natile mwa mazazi a Jesu. Bafarisi ne ba sa lumeli mwa Moya ufi kaufela, mi ba tibela Jesu. Jesu ali, “Amu ba tuhele. Haiba sibofu si etelela sibofu sesiñwi, bubeli bwa bona ba ka wela mwa musima. Mutuhele . . .” Azwelapili ku kutaza, ni kufolisa bakuli, ni kueza limakazo, ni lika zeswana fela. Ne li si ka Mu paleliswa, kakuli Na li yena Linzwi. Linzwi li zwelapili ona cwalo, hakuna taba ka ze ezahala.

⁵⁵ Kacwalo lu fumana lika zani inge lizwelapili, mi kwa mafelelezo za tubula mo mwa mazazi a maungulo. Sina Jambresi ni Janise mo ne ba lwaniseza Mushe, ki mo ku ka bela nto yeswana.

⁵⁶ Cwale, ku kauhana kokutezi kuzwa kwa ku sa lumela kaufela. Mi, muhupule, Abrahama mushemi na si ka fuyolwa mwa niti konji ha utwela sa na mu bulelezi Mulimu. Mi ni luna ki moluka shwela kutokwa, kutokwa, kutokwa haluna kufuyolwa mane, ni kuba ni limbuyoti, konji ha lu ta utwela sa bulezi Mulimu.

⁵⁷ Nto yeñwi ye Ni bata kuli muleuhe mo mwa kauhanyo ya 12, kuli buitamo ne busina milao yetamilwe kwatensi. Nekusina ze ne tamilwe kwatensi. “Ni nani,” isiñi kuli “haiba wena.” Nekusina haiba ku ona. “Ni ezize kale.” Afa Abrahama buitamo, bobusina milao.

⁵⁸ Mi cwale ha mu zibe, mwa bulikani bwa Adama, neli kuli, “Ha u sa swalí kota ye, kipeto Ni ka eza sa *kuli-ni-kuli*. Kono haiba ueza cwalo, kipeto Ni ka eza sa *kuli-ni-kuli*.” Mwabona, wani neuna ni mulao otamilwe ku ona.

⁵⁹ Kono mwa buitamo boo, “Ni ku ezize kale kuba ndatahe macaba.” Mi Yena ki kal- . . . Kaufela zona halina milao ku zona. Buitamo butezi fela muhau, ki muhau fela kihona. Nto fela yene bana ni kueza kuli ba buluke buitamo boo neli kuina kwatuko ni kusiala mwa naha; mi mbuyoti kaufela, yene zamaelela ni bulikani, neili ni bona. Nto fela yene bana ni kueza neli kuina mwa naha. Cwale lufumana cwana, ha ne se baile mwa Egepita, ba latehelwa ki mbuyoti ya bona, kono isiñi buitamo bwa bona. Buitamo ne bu sa li nibona. Ba latehisa mbuyoti yabona, kono isiñi bulikani, kakuli buitamo bwa bona neli muhau, bobusina mulao.

⁶⁰ Mi mwa—mwa Exoda, kauhanyo ya 19, Ex-... Isilaele naeziize iliñwi ya lika za putako zekile zaezahala, neli habato hana muhau ni kuamuhela mulao. Mutualime muhau so no ezize. Muhau no ba file mulamuleli, na bafile mupolofita, ni Siita sa Mulilo ku to mu paka ka Linzwi le li tiile, neli ngunyana ya sitabelo. Muhau no ba fileancafazo yetuna. Muhau no ba lamulezi, wa kwalula Liwate Lelifubelu, wa ba lamulela kusilela mwabuse. Aba lamulela ka lisupo ni ze komokisa, kaufela zona neli ka muhau. Kono ne ba bata nto isili kuli baikezeze mabizo amatuna.

⁶¹ Cwale, haiba bao ha ki batu fela kacenu, ki nto yeswana fela. Bana ni kuba cwalo, mutu una ni kukena ku zona mwa sibaka sesiñwi. Mi foo kona Isilaele fone iezelize mafosisa amatuna, ha i to hana muhau ni kunga mulao, mwa sibaka sateni. Mi ni... Niteñi, kono bulikani bwa Na ezize ni bona ne busina mulao ku bona. Isali nto yeswana ni kacenu, lwa ifumana cwalo.

⁶² Abrahama, kanti, amano fiwa milao yee, akalisa musipili wa hae, kuzwelapili. Cwale lu fumana kuli a funduka.

⁶³ Mi mwa kauhanyo ya 13, kwa mafelelezo ataha fa sibaka sa kuutwela Mulimu ka kutala. Cwale lufumana cwana, mwa kauhanyo ya 13, kuli Lota... Pili, nangile ndatahe, mi muuna muhulu nali mwa nzila. Mi alika kuya ni sikwata kuzamaya ni yena. Mi cwale ha u eza cwalo, foo kona fo u ba ni zona. Mulimu naize, "Kauhana."

⁶⁴ "Kihande, Na ku bulelela, ha ba lumeli luli, kono..." Kipeto mube kwahule ni zona. Yeo kona nto fela inosi, inela fela kwahule ni zona.

⁶⁵ Mi cwale muuna muhulu, kwa mafelelezo, bamano mu buluka, mi, Lota aba mu—mu ca sanda sa mbisikiti, mo lukona kubulelela. Lu fumana kuli akala kutongooka. Mi bubeli bwa bona ba fuma, mi baba ni zeñata za kuohohana ka zona. Mi lu fumana cwana kuli Lota akala ku omana, balisana ba hae kulwanisa balisana ba Abrahama.

⁶⁶ Mi lu fumana cwana kuli Na si kaba cwalo, Mulimu na si ka fumana busepahali luli ku...-aham, Abrahama, kuli autwele sa Na mu bulelezi kueza, ka ku kauhana kufelelela kuzwa kwa bana bahabo, kuzwa kwa sicaba sa hae kamukana, ni ku Mu sebeleza.

⁶⁷ Kacwalo lu fumana kuli, Mulimu ubulela ku Abrahama fa, fa aletare, mi a mu bulelela sa kueza. Kwa mafelelezo, Lota, ha kutaha puzo mwahala Abrahama ni Lota; neli mwana muhulwana hae Harani, mi ba... Nali malumahe. Mi mafelelezo ali, "Tuhela... Luna lu bana bamba cwale. Lusike lwaba ni kuohohana mwahala luna. Cwale wena, haiba uya kwa upa, Na nikaya kwa wiko. Mi haiba uya kwa wiko, Na ni kaya kwa upa. Cwale ha lu ikabe fela, mi haluna ku... Kuna ni sibaka sesituna kwanu se si lu lulikana kaufela luna. Mi wena ikele fela, ikezeze fela keto." Cwale wani neli moywa Bukreste bwa niti

ku Abrahama, mufange sila keto ya makalelo. Mi kacwalo a mu lumeleza kunga nzila ya hae.

⁶⁸ Mi Lota, sina babañata hahulu kacenu, abona kolo. Kambe nazwile kwa kuhohana kwani, kupalañi, na ka ipumanela madollar nyana, nakaba muuna ya zibahala. Kacwalo atalima kwa Sodoma. Mi neli naha yena ni mezi hande, ni muleneñi omutuna, ni sikwenda tuna sa lizwai, ni zeñwi cwalo. Bona, nebana ni balekisi ba libyana kwani. Mi—mi cwale, hape, nekutezi hahulu linako zetabisa, basali ni mipende ya bona yabo Jezabele ni lika kaufela, neli nako yende fela. Musala hae na ikutwa ka nzila yeo, niyena, kakuli, lu fumana kuli, amano ba muyemeli wa tolopo kwani kuli abe a—abe atabela mukwa wa batu bani. Mi yeo kona nzila fela yonani kueza ka yona, ki kulyanganga mwahala lika. Mwabona?

⁶⁹ Mulimu ubata kuli ukauhane kwa lika, mi—mi ube kwahule hahulu kwa lika zeo kufitela utokwa kulibona ni hanyinyani. Kuli, ha ubata kubona nto yeñwi, ubona fela Yena ni Sa sepisize.

⁷⁰ Kono musala Bo. Lota, yena alitabela. Mi, hakuna kukakanya, na bulezzi kuli, “Mulatiwa, cwale Ne nili kwani, mi ubone fela basali mo ba tinela kulo kwani, mi talima fa basizana bani. Talima basizana ba luna mo ba tinela. Kona kuli ha uboni kuli bona ba zamaeleta ni lifasi la kacenu?” Oh, mawi! Haiba ha lu si ka kena mwa Sodoma yeñwi hape, Ha ni sa ziba libaka. Lu fumana ona cwalo.

⁷¹ Kono Abrahama aina ni sepiso. Mi lufumana kuli, halinze li zwelapili cwalo, mi ni . . . hane ba kauhani cwalo, ni Lota. Mi Abrahama anga sibaka sesi sina mununo, kabaka kakalikani fela, apila kone kusina bucwaní bobuñata bwa likomu za hae. Mi, kono, na itukisize kuya ka nzila yateni, kakuli Mulimu na mubeile mwa naha yateni, mi ona mwani kona mwa na bata kuina. Na itukisize kuikungela yona.

⁷² Cwale kwa mafelelezo, ayo utwela Mulimu ka kutala, ha yo utwela Mulimu ka swanelo ni ka kutala, kuli akauhana hande ka kufelelela, neli ka yona nako yeswana Mulena ha bonahala ku yena hape. Kufitela aeza cwalo, Mulena nainzi buhule ni Abrahama. Kono cwale amano utwela ka kutala, mi Lota . . . Mulimu abonahala ku yena, Ki hali “Abrahama, nanula meto a hao. Talima kwa upa, talima kwa wiko, talima kwa mutulo, talima kwa mboela, kaufela zona ki za hao.” Amen. Cwale, Na lata cwalo.

⁷³ Mi, mwa ziba, seo siswana inge nako ye Ni puluswa. Ne ni nze ni utwanga za Mulimu nako kaufela kuli ki Mulimu yomutuna. Mi, mwa ziba, ha Ni to puluswa, Na . . . Yomuñwi ali, “Cwale zo lukela fela kueza ki kuikopanya kwa keleke, ni kubeya libizo la hao mwa keleke ye ya Baptist kwanu. Kona fela zo lukela kueza.”

⁷⁴ Kono, mwa ziba, zazi leliñwi Na bona kuli Nenili muca sanda wa nto yeñwi, kuli Ne—Ne—Ne ni bata kutalima kusona ni kubona sene Ni nani. Mwa ziba, Ni nzi fela ona cwalo. Sina sis-i siswaniso sesituna, una ni sona, mi—mi lika kaufela mwateni ki za hao.

⁷⁵ Ha—ha mu zibi se munani konji ha u talima mwa Bibele, kuli ufumane lisepiso. Amen. Ba ka kubeya kwahule ni zona haiba bakona; kono ki za hao. Sepiso kaufela ku Abrahama ni kwa Peu ya mwa mulaho wa hae. Amen. Sepiso kaufela ya Bumulimu mwa Linzwi ki ya Abrahama ni Peu ya hae, mi u muca lifa wa zona. Muca lifa! Oh, mawi! Ni tabelanga kutalimisisa mwateni kuli nibone se Ni nani. Haiba mutu unifa sika, Ni tabela ku si talimisisanga. Mi Ni tabela kutalimisisanga mwa Bibele ni kubona se sili saka. Peu kaufela ya Abrahama ilukela kueza cwalo, ha u pepwa sinca, utala Moya wa Mulimu, ni Moya o Kenile fahalimwa hao, u ba muca lifa kwa lisepiso zeo kaufela.

⁷⁶ Mwa ziba, kuswana sina ha Ni bulezi, ka za siswaniso sesituna, kakuli lu kolobelizwe mwa siswaniso seo. Ka Moya ulimuñwi luna kaufela lu kolobelizwe mwa Mubili ulimuñwi, mi Mubili wani ki Kreste, ili yona Peu ya Bulena ya Abrahama, mi lu baci ba sanda kwa lika kaufela zeliteni ku yona. Amen. Liki kaufela zene li ku Mulimu, Mulimu a li sululela ku Kreste; kaufela zene li ku Kreste, U li sululezi ku mulumeli. Amen. Mulimu fa halimwa luna, Mulimu ni luna, ni Mulimu ku luna! Liki kaufela, sepiso kaufela mwa Buka, ki ya hao haiba u i lumela, haiba una ni tumelo luli ya ku lumela cwalo.

⁷⁷ Mwa ziba, Ni talima kwa ni kwa, haiba Ni fumana sika sesi pahami nyana, ha ni sa zibi sika, Ni ka pahama fa manela ni ku ipotolosa, ni kupahama ona cwalo mane Ni fite fateni. Kona nzila yeo, sepiso mwa Bibele, haiba sika kaufela si bonahala inge ki mufuta wa kunutu cwalo ku na, Ni tundamenanga fela kulapela konji Ni fita ku sona. Ku felile. Kona mwa kuezeza cwalo. Ni zwelapili fela kulapela, ni kuswalelela ona cwalo, kupahama, kulumela, kufitela uba... Uba muca lifa ku sona, una ni sepiso ya sona, mi una ni tukelo ku sona, mi, “Mukupe mu ka fiwa, kakuli lika kaufela za konahala ku baba lumela.”

⁷⁸ Cwale lu fumana cwana kuli Abrahama na zamaile mwa na ha. Mulimu amu bulelela, kuli, “Zamaya mwahala na ha, u italime. Liki kaufela ku yona ki za hao. Sibaka sifi kaufela ki sa hao. Kaufela sona ki sa hao.”

⁷⁹ Cwale lu fumana cwana, kuli, mwa kauhanyo ya 14 ya Exoda cwale kamba... kauhanyo ya 14 ya Genese, muni swalele. Mwa kauhanyo ya 14 ya Genese, Abrahama ni Lota ne se ba kauhani, mi Lota kwa mafelelezo akena mwa butata. Mi kamita mukana muba cwalo, ha mu kauhana kwa balumeli, mukana mukena mwa butata. Lu fumana kuli malena ne se ba tamahani ni kutisa ndwa. Mi ba shetumuka ni kuhapa Sodoma, ba hapa Gomora,

ba hapa malena ba bona kaufela mwa mabala ni mwa misindi, ni lika kaufela, mi banga ni Lota. Mi batu fela babalikani ba sabela mwa malundu.

⁸⁰ Mi basino eza cwalo, yomuñwi yana sabile ataha ku to bulelela Abrahama wa Muheberu, abulela, ali, “Sodoma iwile, ni Gomora, mane bangile malena ba bona kaufela, ni—ni lika zeñwi kaufela, ni kunga batu kaufela, ni sifumu sa bona ni lika kaufela zene banani. Mi banga Lota ni musala hae, ni bana ba hae ba basizana, basali kaufela, mi baile ni bona.”

⁸¹ Cwale, Abrahama, mutualime moyo wa Bukreste wo ha u latelela muzwale wa hae. Neba cwalo, niteñi, Lota inza wile, hana kutezi mwa mulaho, kono ni cwalo Abrahama a mu lata. A zwelapili kulatelela.

⁸² Inge fela Jesu, mwa Lusika lwa Keleke ya Laodesia. Ibo, ba Mu kashelize kwande a keleke ya bona. Mi Nali kwande, inza ngongota, kulika kukena mwahali. [Muzwale Branham ungongota hasupile fa katala—Mu.] Kambe Na kaba fela ni yana ka kwalula sikwalo kuli Akene mwahali!

⁸³ Ki wani mota wa Abrahama wani, mwabona, u latelela muzwale wa hae ya wile, muzwale ya shebile. Mi ki ha mu latelela, mi anga batanga ba hae ba baana mianda yemilalu ni kubafa lilwaniso. Mi ayo mu katanyeza kwa Dani; kwani ki kwa mafelelezo luli a Palestine koo. Mi a mukatana kwani, ni ku mu lamulela busihu, ni kumatisa mane kulwana ni limpi kwateni, mi akoma malena, ni ku ba bulaya, mi akutisa kaufela ze ne hapilwe.

⁸⁴ Mulemuhe, ha yo kuta, ha ki siswaniso kwabunde kulo faa. Ki kabakaleo ha Ni tabela fela kutalimisia fateni hanyinyani, kuli lube ni...kale Ni si ka fita fa tuto yaka ya *Jehova-Jaire*. Haiba mu lemuha Abrahama ha kutisa kaufela ze ne latehile, muzwale wa habo yana lyangani ni bana, hana ilo ba kutisa, malena ba taha to mu katanyeza.

⁸⁵ Mi Melekisedeke ataha ni yena, “Yanali Mulena wa Salema, Mulena wa kozo, ili Mulena wa kuluka, ili Mulena wa Jerusalema; yasina ndatahe, yasina mahe, yasina makalelo a mazazi, yasina mafelelezo a bupilo.” Melekisedeke amu katana kwa kubul-...ha zwa kwa kubulaya mulena, ili Yoo mupatriareka Abrahama (Maheberu 7) akatana Muuna yo ni kulifa sabulishumi, sabulishumi. Ha ki Muuna kwa butuna mwa na lukela kubela yoo! Mu nahana kuli nali mañi? “Na sina ndatahe. Na sina mahe. Na sina makalelo.” Mi Yo ali Yena kaufela, U sa li ya pila. “Na si ka fela. Mulena wa Salema, Mulena wa kozo!” Oh, Muuna yomutuna yo kanti neli Mañi?

⁸⁶ Mi mulemuhe mufuta o lufumana fa. Kasamulaho wa kufela kwa ndwa, hamulaho wa—wa mulumeli wa niti ha sa lwanile ni sila, asila milulwani ni kulika kuswala muzwale wa hae, yona Peu ya niti ya Abrahama yayo kutisa muzwale ya na lyangani

yani, Melekisedeke ataha mi amufa waine ni sinkwa, mulalelo, kufa mulalelo kasamulaho wa ndwa ifela, amufa mulalelo ku yena kasamulaho wa ndwa.

⁸⁷ Mufuta o munde luli wa ndwa hase ifelile, fa fa lifasi, lindwa ha se li komilwe. Jesu naize, “Ba ka ca sinca mwa Mubuso wa Ndate,” tuyambaeli ha sa kutisizwe. Mi nto yapili ye lueza ha lu kena mwahali, kasamulaho ndwa imano fela, ki kuinafafasi kwa tafule mwa Mubuso wa Mulimu. Mi kwani baba Iwanile, ni kuinafafasi ni kukoma, ba ka apala kuluka kwa Kreste, mi hape kipeto ba ka nga sinkwa ni waine, mwa Mubuso wa Ndate kwa neku leliñwi. Ha ki siswaniso kwa bunde ni seo, sa Abrahama ya zwela kwande ha yonga Lota ni ku mu kutisa.

⁸⁸ Cwale lu fumana cwana, kuli mwa kauhanyo ya 15, lu fumana nto yeñwi ye ipitezi faa. Na—Na tabela nto ye, hande luli, ka kubona yoo Abrahama nali yena cwale, mi Abrahama ni Peu ya hae ni ya mwa mulaho wa hae. Lu fumana fa, kuli kasamulaho Abrahama ha sa eelize lika ze kaufela; na lumela ku Mulimu, ni ku kumalela kwa sepiso, aikambusa ili yena, mi mwahala lika kaufela na latelela mwa nzila ya—ya kubuluka litaelo za Mulena; lu fumana cwana kuli Mulimu abonahala ku yena fa aletare. Mi Abrahama a Mu buza puzo, ya kuli, “Cwale, ki mañi muca lifa waka kono—kono konji yo Eliezare wa Damaseka? Mi cwale U ni sepisize Peu. Mi Ni—Ni bata kuli U ni ezeze nto yeñwi; Ni bata kuli U ni pakele sepiso yeo.”

⁸⁹ Mi Mulimu ali Na ka i paka cwalo ku Abrahama, kupaka buitamo bwa Na eelize mwahala Hae ni Abrahama. Cwale Uka mu fa sisupo sesika sa ba sa niti. Kuli, ni ha sa supezi, sa sutelezi bukaufi ni myaha ye eite-faifi cwale, kono ibo Uka bonisa ku yena, ka sisupo, kuli Uka buluka buitamo bwani.

⁹⁰ Oh, Ni tabile hahulu kuli Mulimu kamita wa lufanga lisupo, kakuli Yena . . . Lu lukela kuziba, kacenu, kuli hola yelupila ku yona cwale, ku lukela kuba sisupo mwa lifasi ka nako yona yee. Lu na ni kubata sisupo. Mulimu hakuna sa ezanga kusina pili kufa batu sisupo sa temuso. Mi sisupo sa niti si latelewanga ka linzwi, mi linzwi kamita ki linzwi la Mañolo.

⁹¹ Cwale Uka paka buitamo ku Abrahama, kamba Abram, pili ka nako yani. Mi ki Hali, “Nga nkowana ya sitole.” Cwale, muhupule, yeo ki namani ya sistole. “Mi unge ni puli ya musali ya lilimo zetalu. Yeñwi ni yeñwi ya lifolofolo zeo lina ni kuba za myaha yemilalu ya kupepwa.” Mulemuhe, sitole sa lilimo zetalu za kupepwa, sa sitole; puli ya lilimo zetalu za kupepwa, ya sitole. “Ni totolo,” ya poho. Ifi kaufela ya zetalu, ibe ya lilimo zetalu, mi kuna ni zetalu za zona. Zetalu; za sisali, litole zepeli, ni ya poho. Mwabona? Ya lilimo zetalu za kupepwa, sitabelo sesikenile, sa ngunyana . . . sitole, sa lilimo zetalu za kupepwa ni puli ya musali, mi cwale kutaha totolo ya muuna.

⁹² Haiba mu lemuha, sika kaufela mwateni siyaha mwa siswaniso. Mi cwale ha Ni lukeli ku kutaza tuto kuzwelela fa katala fa, mi Na ziba hande kuli zeo lifa kaufi hahulu mwakona ku libona. Mulemuhe. Mi anga zepeli, linyunywani zepeli. "Nkwilimba iliñwi ni liiba li liliñwi," ili lubasi lo luswana, nkwilimba ni liiba.

⁹³ Cwale apuma puli...ngu mwa liemba zepeli. Apuma ni—ni totolo ni puli, ni zeñwi. A li kauhanya, alipumaka fahali, ni ku libeyafafasi. Kono maiba, yena...ni nkwilimba, na si ka ipuma fahali. Yani neli cwalo, eeni sha, mutu kaufela ya ziba Mañolo, uziba kuli yeo ki foliso ya Bumulimu. Mwabona, li mwa bulikani bobubeli. Mi kacwalo lu fumana cwana, a libeya fahali. Foliso kamita itaha ka tumelo mwa Mali a suluzwi kamita. Mi bulikani bwa kale nebuna ni foliso ya Bumulimu, kana Bulikani Bobunca buna ni zekuma kai? Mwabona? Haiba bulikani bwa kale nebutisize zeo, kucwani he ku Bobunca, kanti, "Ki bulikani bobunde ni kufita, bubulela zende, lika zepahami, lika zetuna, lika zende"? Ki Bulikani Bobunca!

⁹⁴ Cwale lu fumana cwana, kuli Abrahama, ha na ezize se, cwale mulemuhe sene si ezahalile. Cwale ki ye taba yetuna, yeipitezi. Ha ni lati kuli mu—mu—mu mbwinje se. Tiisezo ya bulikani, ka manzwi amañwi, ki sepiso, kuli, "Na sephala ku ze Ni eza kamba ze Ni bulela kuli Ni ka eza," Mulimu inza paka cwalo ku Abrahama.

⁹⁵ Mi ki hanga litabelo zani ni ku libulaya, ni kulibeya kwa mafelelezo, hamoho, ha na li beya fafasi; ni kutilima linyunywani halizwa ku zona, kuli linyunywani lisike za taha fa nama ye mezi, kufitela lizazi hane liyo likela, mwa manzibwana. Mi cwale lizazi ha li yo likela, kamba ha ne li likela cwalo, ona foo Abonisa Abrahama sa Na ka eza kwapili, sene si ka ezahala.

⁹⁶ Mulemuhe, Abulelela Abrahama: Nto yapili yana boni neli sabo yetuna ya lififi lene li mu tahela. Pili, buloko bobutuna luli bwa mutahela. Cwale, kulobala kwani ne kutilusa lifu fahalimwa masika a batu kamukana. Mutu kaufela una ni kushwa; lifu kwa nyangela kaufela ya batu. Buloko bwani bwa mu tahela; mi kusika ezahala kale zeo ze—ze sabisa luli za lififi; mi ki ha kutuka ondo ya mulilo; mi cwale Liseli nyana lelituka nelituka mwahala buitamo, neli tuka mwahala litabelo, ku likauhanya. Cwale seo sitalusa sikamañi? Si talusa kuli mutu kaufela ya pila una ni kushwa; mi kaniti, kasamualaho wa foo, u swanelia kuya kwa lihele; yeo ki niti, mwa lififi, lififi la kwande, lene li kauhani ni Mulimu; kono Liseli la taha, mi laya fahali, kuaba litabelo zani. Haiba mu utwisisa, luna...Bulikani bwani!

⁹⁷ Sina luna ma American, lu ezanga cwani bulikani bwa buitamo? Kihande, nto yapili ye luezanga, lu bulela kuli, lu ka ba ni kutwani ya litekisano zeñwi kamba nto yeñwi, luzwelanga fande ni kuca; ni kuina fafasi, lwa ikambota nyana, ni kufa

litaba za luna mo likabela; mi kipeto ni kuswalana mwa mazoho. Lu bulela kuli, “Swala mwateri!” Boo kona buitamo bwa luna bulikani. Yeo ki sepiso ya luna.

⁹⁸ Cwale, mwa Japan, mwa ziba mo ba evezanga buitamo? Bana ni hape nto yeñwi yeba canga; mi kipeto ba nopa kabotela ka lizwai, mi ba posakana lizwai ku yomuñwi ni yomuñwi. Yeo ki tiisezo ya tamahano ya buitamo.

⁹⁹ Luna lu swalananga mwa mazoho, kuli, “Ku tomilwe, mushimani tuwe. Na lumela cwalo. Ni ka ina ni wena. Ki sepiso.”

¹⁰⁰ Mwahala ma Japanese, Japan, ba nepelananga lizwai ku mañi ni mañi. “Li tamilwe, mulikani. Ao kona mafelelezo a zona.” Ao kona mafelelezo a likañi kaufela he. Bona, ba ezize buitamo, ba bu tiisize, ka kuposaka lizwai ku mañi ni mañi.

¹⁰¹ Kono mwa mazazi a kale. Ni itusise iliñwi ya ze kana? [Muzwale Branham unopa iliñwi ya liemba za pampili—Mu.] Mwa mazazi a kale, ki cwana mo ne ba evezanga buitamo. Lwa ñola tumelelano, ni kunga tumelelano kuiñola sina *cwana*. Mi kipeto lwa bulaya folofolo, ili sitabelo; ku si aba fahali, ku si lobaza inge mwa nako ya Abrahama yani. Mi cwale lwa yema mwahala bulikani boo, wena ni Na, mi lwa fa buitamo ku Mulimu. “Haiba lupalelwa kubuluka bulikani bwa buitamo boo, lube sina sitabelo se sishwile se mwa sibaka sa luna. Kipeto mali a sitabelo seo abe buikalabelo bwa luna. Lu shwe lifu leliswana, haiba lu palelwa kubuluka buitamo bo.”

¹⁰² Kipeto kaufela bwa ñolwa, kamba kuñolwa fa siemba sa pampili since *cwana*. Kipeto ya pazulwa fahali kueza zepeli, sina *cwana*. [Muzwale Branham upazula pampili kueza zepeli—Mu.] Cwale wena unga siemba sesiñwi, mi Na ni nga sesiñwi. Mi cwale, mwa bona, haukoni ku likanyisa seo ni hanyinyani, sihulu haiba liñozwi fa mukata wa ngu. Mwabona, hamukoni ku likanyisa se ni hanyinyani. Ye ina ni kuswalana hande ni *yani*, kuli ibe cwana. Mi cwale ha lutaha hamoho, Ni taha ni siemba silisiñwi, wena utaha ni siemba sesiñwi. Mi cwale ha lutaha hamoho, mi buitamo bo buna ni kueziva, mi buitamo bwa luna bwa fiwa, kipeto siemba sa pampili yaka sina ni ku lumelelana hande ni pampili ye, mi kabakaleo ki wena ya li ni na mwa buitamo boo.

¹⁰³ Sana na bonisa Mulimu fani Na sweli kueza, kuli Mulimu yena Kasibili na taha mwa nama, mi Na ka ba mwa buitamo boo. Mi Mulimu anga Kreste, Moya; Mulimu Jehova anga Kreste, fani fa sifapahano, mi A Mu pazula fahali. A pazula moyo wa Hae ni ku ubeya mwa Lihalimu, mi anga mubili ni ku ubeya mwa libita. Mi a nanula mubili, ka nako ya kakusasana wa zuho; mi alumia Moya onoli ku Yena, kuli ube mwa Keleke. Kuli, yona tiisezo yeswana mwa lizazi la mafelelezo le, “Jesu Kreste ki ya swana maabani, kacenu, ni kuyakuile,” koo bulikani bobuswana bwani ne bu ka beiwa fa sicaba.

¹⁰⁴ Ukona kuba cwani ni Bona ka tuto? U kaba ikungela Zona cwani kanti kusina kupakiwa ka tiisezo ya bupilo, ili Jesu Kreste ya zuhile ya zusizwe kwa bafu mi uinzi kwa Bulena bwa ka Lihalimu, busihu boo? Ka Moya o swana onoli ku Yena, kona oli fa Peu ya Silena ya Abrahama, mwa mazazi a maungulo, kupaka ni kubonisa kuli ki Ya swana maabani, kacenu, ni kuyakuile. Amen. Si mi eza kuikutwa bulapeli, nji cwani? Ki zeo foo, mwa bulikani bwa niti, “Ni ka ñola bulikani bwa Ka mwa lipilu za bona.” Jesu naize, “Lika ze Ni eza mu ka li eza ni mina.”

¹⁰⁵ Ha lunze lutaha mo mwa Sodoma, mwa mizuzu yelikani, mutualime mo liinezi, mo li ezahalela, ona cwalo sepiso mo ibezi mwa mazazi a maungulo ni za Ka eza.

¹⁰⁶ Na sweli ku li tiiseza, kubonisa kuli Yena . . . Apazula mibili wa Jesu fahali, kunga Moya, ananula mibili kuya kwa lizoho la bulyo la lubona lwa Mulimu; ni kulumela fa lifasi kalulo yeñwi, kalulo ya Na pazuzi, ili Moya fahalimwa luna, ona o bizwa kuli Moya o Kenile. Mi ona Bupilo luli bone buli ku Kreste bu ku wena, ili kubonisa kuli ki Yena Muliululi wa hao. U ku añulezi ku Mulimu, mi cwale lu bana ba bashimani ni basizana ba Mulimu, ni Moya wa Kreste. Amen.

¹⁰⁷ “Misebezi ye Ni eza mu ka i eza ni mina. Yemituna mane ku ye ki ye mukaeza, kakuli Ni ta ku Ndate Luli.” Amen.

¹⁰⁸ Moya o noli ku Yena u ku wena, Bupilo Bobusafeli. Ki yena mufani wa Bupilo Bobusafeli. Ki yena Muliululi, kuli akutise se si wile mwa nako ya kuwa, mwa lusika lwa batu, ku kutiseza ku Mulimu. Ni Moya onoli ku Kreste u ku wena. Mi haiba moya wa—wa Dillon nokaba ku na, Ne ni kaba ni litobolo. Haiba moya wa sikuwala sa nokaba ku na, Ne ni ka swanisa maswaniso. Haiba Moya wa Kreste u ku wena, misebezi ya Kreste kona yo ka eza. Amen. Yeo ki niti. Bupilo bone buli ku Yena bu ku wena.

¹⁰⁹ Muzuse bupilo kuzwa kai kaufela kukena mwa nto isili. Haiba ukona kunga bupilo bwa—bwa mupusi ni ku bu beya mwa mukoti wa lihapu, lika beya mipusi, ona cwalo. Munge bupilo kuzwa bwa kota ya litolwana, ni ku bubeya mwa kota ya yeswana ni apule, ika beya ma apule cwalo, kakuli bupilo bo buli mwa kotabufa bupaki bwateni.

¹¹⁰ Mi cwalo kona mo iinezi Peu ya Silena; ka Isaka kwa taha peu ya nama, yene Bu latuzi. Ka kusilana, kuzwa ku Efraimi kutaha ku Manasse, neku cincani, mbuyoti yezwa kwa lizoho la silyo yataha kwa lizoho la nzohoto; kamba lizoho la nzohoto ne li lukela kuya ku la nzohoto, wa mwanana kuya ku yomuhulu; mwahali mwani kwa taha buino kaufela kuzwa kwa peu ya nama ya Isaka, yene hanile Kreste, mi keleke ya nama kacenu i sa Mu hana.

¹¹¹ Kono haili ya moya, Peu ya Silena ya Mulimu ye lumela, Peu ya Silena ya Abrahama ye lumela Linzwi kaufela la Mulimu, kuna ni tiisezo ya kupila, Jesu Kreste ya zuhile mwahala bona.

Amen. Amen. Oh, mawi! Mwabona, nto yeswana neli yona, Keleke kamukana ina ni kuba mwa swalisano.

¹¹² Ha ne i swanisizwe mwa peu ya nama, mutualime, Isaka ni Rebekah neli bana bahabo, sihabo sa mali, bashemi ba baswana; mwabona, bashemi ba bona neli mizwale, baba bahabo ka mali, munyalowi ni munyali.

¹¹³ Miku Adama ni Eva, kaufela neli Adama, ka kukala. Mulimu anga likupo ku yena ni kueza musali, mi Anga moyo wa sisali kuzwa ku Adama ni ku ubeya ku musali.

¹¹⁴ Kabakaleo musali ha eza za siina, kuna ni zeñwi . . . kuna ni kulyangana kokuñwi. Mi ni muuna abata kueza za sisali, kuna ni se si fosahalile kokuñwi. Mulimu na bupile muuna kuli atinange sina muuna, ni musali inge musali. Yena ulatile kuli baine ona cwalo. Amen. Ha mu ba bona baeza lika lisili, kuna ni se si fosahalile. Ki kulyangana. Mi taba yateni kaufela ki sirkwata se si lyangani. Yeo luli ki niti. Masika kaufela, lusika kaufela, ki kuli, “taba yateni kaufela ki sitombo sesitezi bulalu,” sina Bibele ha i bulela. Hakusana lika za ngana kai kaufela. Mu ziba kuli yeo ki niti. Ha mu sa kona kufumana sika—sika mwahala zona kwande . . . Kono muzwele kwande mwa mikwakwa, kutata kufumana muuna sakata; ki ba sisali fela sina mo Ni bonezi. Mi basali, ba tina malukwe, bakuta milili yabona, ba ipenta fa milomo, bazuba kwai, kulika kuba inge muuna. Kiñi so batela kuba inge muuna? U lukela kuba kalibe.

¹¹⁵ Ni sisupo, se sisili, “Litafule za likalibe,” mwa sibaka sa manwelo.

¹¹⁶ Se nili, “No sina muleki.” Kalibe haana kuya kwa sibaka se si cwalo. Batili, sha. Batili, kalibe hakoni kuba cwalo. Musali wa kona, kono kalibe hakoni. Haana kukena mwa sibaka se si cwalo. Kono ki fo he cwale, mwabona.

¹¹⁷ Mulimu a kauhanya, kupuma. Mwabona, Mubili, Munyaliwa wa Kreste, una ni ku kuta kwa mulaho pili. Cwale Eva nali . . .

¹¹⁸ Eva nali sikamañi? Yena ni Adama ne ba swana. Neba bizwa kuli Adama. Neli ba moyo. Ha Na bupile mutu, nako yapili, A mu eza ka siswaniso sa Hae Luli. Mi Mulimu ki Moya. “Mwa sibupeho sa Mulimu Amu eza, ili muuna ni musali aba bupa cwalo.” Na li cwalo . . . mi niteni nekusina mutu wa kulima mubu. Mi Mulimu aeza mutu wa liluli a lifasi ni kubeya mioya yemibeli ye ku yena, mi yani neli Adama wa makalelo.

¹¹⁹ Mi cwale Ha to kauhanya Eva ku Adama, Eva awa ka ku sa lumela Linzwi. Yeo ki niti. Foo kona keleke fo ipalelezwi kacenu, ku sa lumela Linzwi!

¹²⁰ Kono mwa taba ye, kwa Peu ya Silena, ye bizwa, kusupezwa kwa Bupilo Bobusafeli, yona Peu ya Silena ya Abraham, ba lumela Linzwi. Hanina taba ka zetaha kamba zeya, mo ba ka sehela, ya bulela *se, sani*, kamba *sesiñwi*, ba lukiselizwe kuya

Bupilo Bobusafeli. Mi uya hande ona cwalo kwa mulaho. Musali ni Mulatiwa wa hae, Kreste, ki alimuñwi. Bupilo, Moya bo buli ku Kreste, kona bobuli mwa Keleke. Bwani kona bulikani bwa bona bo Busafeli, fa. Mwabona? Mulimu na ngile Moya wa Kreste, aupazula fahali, fa sifapahano fa Kalvari; mi anga Moya wani, ananula mubili ni ku ubeya kwa lizoho la bulyo la Lubona lwa Mulimu ni Bulena bwa kwa Lihalimu. Zeo, lika kaufela mwa Lihalimu li zamaiswa ki Yena. Mi cwale Moya o noli ku Yena, wa kuta; ona Moya o swana, isiñi Moya usili, ona Moya o swana wa taha ku Yena, kuli kupakiwe bulikani bwa Peu ya Silena.

¹²¹ Mi mwa mazazi a mafelelezo lu lukela ku i bona, kuya ka Mañolo. Mi kale Munyaliwa wa Kreste asika ngelwa kale mwa lihalimu, kuna ni kuba ni bulumiwa bo bu zamaeleta hande. Amen. Ni tabile hahulu kubulela kubulela cwana, busihu boo, kuli Na ziba kuli yeo ki Niti. Amen. Kulumelelana, kupaka buitamo!

¹²² Na li pakile ona kwani, aiponisa ili yena sa Na ka eza, kupaka buitamo. Muituti wa Bibele kaufela u ziba kuli fani kona fa na pakile bulikani bwa buitamo ku Abrahama. Ki sikamañi sa Na sweli kueza? Kubonisa mwa mufuta, sa Na ka eza, ni zona litabelo zee.

¹²³ Mi cwale seli maungulo, mi Hanina kuba ni nako ya kuaba litabelo zee. Ni ka lukela kueza cwalo mwendi kamuso busihu, kono, mulemuhe, kubonisa seo, litabelo zeo litalusa. Kono, mwabona, Na li pakile, kubonisa kuli mwa mazazi a maungulo . . .

¹²⁴ Cwale mutu ufi kaufela yakile abala litaba za kale, uziba kuli ki yona fela inzila inosi mo ne ba ezeza bulikani. Ne ba i ñozi, niu ku ipazula fahali, ni kuitambeka; yo unga siemba silisiñwi, mi yo unga sesiñwi. Nebana ni kukuta, kasamulaho wa sitabelo, ba eza sitabelo sa bona. Kona sa na ezize Abrahama ku . . . kwani kwa Gerari, ni babañwi cwalo, kwa na ile kwani, kone ba beya fa aletare . . . ba beya fateni sitabelo sa bona ni kubulela za buitamo bwa bona, ni ku si pazula fahali cwalo. Mi Mulimu aeza nto yeswana, kubonisa foo kuli sa Na kaeza ku A . . .

¹²⁵ Puzo neli kuli, "Ikai kana—ika kana Peu Yo Ni sepisize? Ikai? Kana Ni kaba cwani ni yona? Sicaba sisweli sa ni seha, sili, 'Abrahama, ndatahe macaba, seli myaha ye lishumi ni ye ketalizoho. Cwale so na ni myaha ye eite-faifi ya kupepwa, kamba—kamba nainte. Bakai, bakai, bakai, bakai bana ba hao kaufela? So na ni bana ba bakai cwale, ndatahe macaba tuwe?'" Mwabona, ku mu bona bukuba. Kono na si ka sitatala. Apila hande ni zeo. A sehiwa, bali, "Ndatahe macaba, cwale ha lubone, una ni bana ba bakai ka nako ye?" Mwabona, kubata kueza lisheha, kakuli na swalelezi kwa lisepiso za Mulimu, na lumela kuli Na kona kubuluka sa Na sepisize. Yena—Yena una ni mata luli. Yena . . .

¹²⁶ Wakona ku iponela sitabelo sa Hae Tota. Yena ki yena Jehova-Jaire. Wa kona kuiponela ni kueza nzila ya sa Na sepisize. Mi Apaka bulikani ku yena ka ku mu bonisa mwa Na ka ezeza, kunga Kreste ni ku pazula Bupilo ku Yena, ni ku bu luma mwa mazazi a maungulo fahalimwa . . .

¹²⁷ Cwale lu ka feleleza zeo mwa Mañolo, biki yee, kuli lu mi bonise litaba zeo, kuli bulikani boo buna ni kupakiwa ka Peu ya Silena ya Abrahama, ili sona sicaba sesi zwelela mwahala Bamacaba, isiñi Majuda, “sicaba se si zwelela mwahala Bamacaba, bakeñisa Libizo la Hae,” kueza cwalo ka Libizo la Hae. Keleke yena ni Libizo la Hae ika kutela ku Yena, kakuli ki Yena yoo ali Yena, Bupilo bwa hae.

¹²⁸ Amuteeleze, ka Lizazi la Pentekota, Moya o Kenile ha u suluha ka Lizazi la Pentekota, Bupilo bwa fiwa kwa Keleke. Mi Keleke ye ne zwezi kwande yani ni kuhula, kwa ñoliwa Buka ya Likezo kwa mulaho wa Keleke yani, ka se ne Si ezizwe, kakuli neli Kreste mwa baapositola.

¹²⁹ Cwale Jesu naize, cwana mwa Joani 15 kuli, “Kina Kota, mina mu mitai.” Cwale, Kota haibeyi miselo yona iñi. Mutai kona obeya muselo. Ufiwa mata azwelela kwa Kota. Kihande, cwale, haiba mutai wani, wapili o no zwile mwa kota, watisa Buka ya Likezo; haiba ika tubula mutai usili, ikaba Bupilo bobuswana.

¹³⁰ Likweli nyana kwa mulaho, Ne ni yemi ni mulikana ka yomunde, John Sharrit, kwani kwa Phoenix. Ni pila mwa Tucson, sina ha mu ziba. Mi kacwalo Ne ni li kwa Phoenix, Muzwale John Sharrit, muzwale yomunde wa Mukreste. Mi yena luli, luli neli mubotana, mi Mulena u mu fuyozi. Mi—mi ha Ni mu bona pili kwa Phoenix, myaha yefitile, nasina bana. Mi—mi na bata bana. Mi—mi bona, neli babotana, na beleka mwa mikwakwa, inza luba sileze sa kuyahisa, na holanga ma centi a twenti-faifi ka hola. Mi yena ataha kwani, mi alumela Linzwi la Mulimu kaufela la Liñusa. Mi ki hali, “Kikuli u ka ni lapelela?” Una ni bana ba ketalizoho cwale.

¹³¹ Mi seo, kwa neku la seo, ufanga madollar alikana foo milioni mwaha ni mwaha kwa musebezi wa Kreste. Mi yeo ki niti. Ne nili ni yena kwanu, ha ki kale hahulu, u babalela litema la hae la bwanda. Na lekile litema kaufela kaufela, nana ni ma Mexican baba mianda ye fifitini kuli aibabalele. Mi nali cwalo, myaha ye fifiti kwa mulaho na sweli fela kufoloma sileze, ka ma centi a twenti-faifi ka hola.

¹³² A ni isa kwande mwa mukokolombwa. Mi Na bona kota ye sehisa luli, kwani, ku ze Ni kile nabona mwa bupilo bwaka kaufela. Neli kota ya mufuta o cwalo, neina mi mifuta ya miselo kaufela. Mi Na talima, mi neina ni ma olonji, neina ni ma lemune, neina ni miselo ya magilepu, neina ni matangerini, neina ni matangelo. Ni sepa kuli nekuna ni miselo ye shutana ye naini, kamba lishumi. Mi se Nili, “Ki kota ya mufuta mañi ye?”

¹³³ “Oh,” ki hali, “yeo ki kutwisiso fela yelikani, Muzwale Branham.”

¹³⁴ Se nili, “Oh, Na bona.” Mi Na li, “Kaufela zona lipila kwa kota yona yee?” Se nili, “Ki kota ya mufuta mañi ye, kwa makalelo a yona?”

¹³⁵ Ki hali, “Ki kota ya olonji. Ki lushaba lwa olonji.”

¹³⁶ Mi se Nili, “Ki yona kana?” Se nili, “Zeñwi ze libata sikamañi kwateni?”

Mi ki hali, “Li comekilwe fela kwateni.”

¹³⁷ Se nili, “Oh, Na bona.” “Na utwisisa.” Se nili, “Cwale, cwale isaho, lika kaufela li ka kutela kwa kuba olonji, nji cwani?”

¹³⁸ Ali, “Oh, batili.” Ali, “Batili, lemune ika tisa lemune.” Ki hali, “Haili . . . mi ni muselo wa gipelu uka tisa muselo wa gilepu, ni tangerini ika tisa tangerini.”

Se nili, “Kuzwa kwa kota ya olonji?”

Ki hali, “Eeni, sha.”

Se nili, “Ha niboni mo ikona kuezeza cwalo.”

Ali, “Kaufela zona ki miselo ya litolwana zeswana.”

Se nili, “Kihande, kulumbwe Mulena! Na bona nto yeñwi.”

¹³⁹ Talima! Oh, muzwale, mi Moya o Kenile wani hautaha mwa Kota yani, ni kutahisa za Kota ya yona kwa mutai wapili, mi za ñola Buka ya Likezo kwa mulaho wa yona. Haiba kota yani ika shoshela mutai usili, uka beya zeswana. Ikaba Jesu Kreste. Cwale luna ni ba Methodist, Presbyterian, Baptist, Lutheran, lika kaufela zeñwi licomekilwe fela ku yona, ba beya miselo ya kopano; kono haiba ika shoshela mutai usili, ukaba wa makalelo, otezi Kreste, Linzwi la Mulimu leli tamilwe ku Kreste.

¹⁴⁰ Mi, amuhupule, mwa hupula liñusa la *Kota Ya Munyaliwa*. Buñata bwa mina mwa shimbanga matepu. Kuli mane mulimi wa simu ataha, mi neibeya mufuta usili wa muselo, mi ki ha ikolela kwateni, ku i lema kwateni, kuzwelapili ku i kolela, ku li pumana kwateni. Kono Joele ali, “Se si siilwe ki nziye, si cilwe ki sishenyi; se si siilwe sishenyi- . . . ki sishenyi, sesiñwi si cile.” Lu fumana kuli likokwani zeo ki likokwani zeswana, fela ki likalulo ze shutana. Mi se ba siile ma Lutheran, ba Methodist ba si cile; se ba siile ba Methodist, ba Baptist ba si cile; se ba siile ba Baptist, ba Pentekota ba si cile. Taba yateni kaufela i pumezwi kwatasi.

¹⁴¹ Kono Mulimu naize, “Ni ka kutiseza, kubulela Mulena, myaha kaufela. Ni ka luma Keleke yeñwi, mwa mazazi a maungulo. Ni ka kutiseza Mata amakalelo hape. Na . . . Mwa nako ya manzibwana, ku kaba Liseli.” Mwa pilu ya kota yani, hakuna taba kamba ki mitai yemikai ye kokoliwa kwateni, ku ka taha Peu ya Silena ya Abrahama! Haleluya! Mulimu na sepisize cwalo. Mulimu uka li eza. Na bulezi kuli Uka li eza. “Ni ka kutiseza myaha kaufela ye li cile likopano. Ni ka kutiseza myaha

kaufela. Ni i kokolezi, kono niteñi ku ka taha Kota kuzwelela mwa pilu ya yona. Ukaba sina kota ye calilwe kwatuko ni linuka za mezi, mutu ya nahana Linzwi la Mulimu, musihali ni busihu,” ha ki tuto ya tumelo kamba kopano, “kono ya nahana fa Linzwi, musihali ni busihu. Uka ba sina kota ye calilwe fakaufi ni nuka ya mezi; mitai yayona haina kuoma. Uka beya miselo ya hae mwa mwaha wateni.” Mulimu u sepisize cwalo.

¹⁴² Mulimu, wa tamulula, ku comola, kulemaka kwateni, ku ikaba ili Yena, inza ikaba ili Yena kasibili. Na ezize nto yeswana ka Lizazi la Pentekota, fani Moya o Kenile ha utaha. Ona Siita sa Mulilo sani sene si tile, sene si latelela Isilaele, kaufela lwa ziba kuli yani neli Logos, ili yena Kreste. Mi ha U tahafafasi, ka Lizazi la Pentekota, ne U ezize sikamañi? No ikabile ili Ona, ni malimi a Mulilo aina fahalimwa ufi ni ufi wa bona. Mulimu inza ikaba ili Yena mwahala sicaba. Oh, muzwale, mwakona kuba baba kauhani, ka Moya o swana onoli ku Kreste.

¹⁴³ “Ya lumela ku Na, misebezi ye Ni eza uka i eza ni yena. Yemituna kufita ye, kamba *yeñata* kufita ye,” kona toloko ye lukile “kakuli Ni ya ku Ndate. Ibo, fa nako nyana lifasi halina ku Ni bona, kono mina mu ka Ni bona, kakuli Na,” ki tulokandina twa mutu, “Ni kaba ni mina, mane mwahala mina, kwa mafelelezo a nako.” Na sepisize kueza cwalo. Peu ya Abrahama, Utensi mo ona fa cwale. Yena . . .

¹⁴⁴ Ki luna ba, mazazi nyana kwa mulaho, ku nyakalala zuho ya Hae, kuli Mulimu na Mu zusize. Lwa paka cwalo. Lwa opela cwalo. Mi hakulata Wakona kubonahala ni kueza nto *yeñwi* ya Na ezize, inge fela mwa Na ezelize kwa makalelo a zuho ya Hae, lukona ku libiza kuli, “mulauli, ki diabulosi, Baalezebubi,” kuli kwalela kwa keleke. Lu eezanga sikamañi zeo? Una ni kutaleleza Mañolo, kuli, mwa Lusika lwa Laodesia, Linzwi, yanali yena Kreste, na beilwe kwande, [Muzwale Branham ungongota hane fa katala—Mu.] ku ngongota fa munyako, kulika kuba ni balikani kuzwa kokuñwi, ataha mi aitibahaza ili Yena.

¹⁴⁵ Kono kuka taha mutai Mwani, ka niti fela inge sika kaufela!

¹⁴⁶ Ne ni ize ku Muzwale Sharrit, “Kona kuli ki mutai wa mufuta mañi o ika tubula isaho? Kana ikaba olonji? Kikuli ikaba lemune nji? Kikuli . . .”

¹⁴⁷ “Eeni, ikaba ya makalelo,” a bulela. “Ha i ka tubula zeswana ni yona, ikaba fela olonji, inge fela mo ne iinezi kwa simuluho.”

¹⁴⁸ Mi cwale Peu ya niti ya Abrahama ha itaha, ona Moya o noli ku Jesu Kreste wani uka pila mwahala bona, Linzwi kaufela li ka bulelwa ka “amen.” [Muzwale Branham u ngongota hane fa katala—Mu.] Ba Li lumela. Isiñi, “Le li susumelizwe, mi *Lani* ha li si ka susumezwa.” Ba lumela Taba yateni kaufela, kakuli Ki Linzwi la Mulimu.

¹⁴⁹ Kana mwa Li lumela, busihu boo, ka lipilu za mina kaufela? [Kopano ili, “Amen.”—Mu.] Na li lumela.

¹⁵⁰ Ni kutilize fa cwale mane seli nako yetelele. Ha lu inamiseni litoho za luna fa muzuzu fela. Mi Ni ka feza ze kamuso busihu. Ni sejisize kuli Hanina ku mi buluka hahulu busihu.

¹⁵¹ Jesu Kreste ki yaswana maabani, kacenu, mi ku pakilwe. Ne kubile hande ku Abrahama, fani ha li bona ka tumelo, azwelapili ona cwalo, a sa sitatali ka ku sa lumela. A si ka sitatala. Cwale kucwani he ka Peu ya Hae ya Silena, luna baba ipapata, kuba Bakreste ba lizazi le, baba ipapata kutubeta komoki yeswana ya Na nwile ku yona, kuba ni Moya wa Hae oswana mwahala luna, ni ku Mubona ha bonisa sepiso ya Hae yakuba mo ni luna?

¹⁵² Sepiso, kuli italelezwe, ha ku si kaba cwalo mwahala masika. Ha lu sikaba ni zona haisali. Mubate litaba za kale. Za li kuba liezahale. Mi ne Libezi kai, ko li lukela kuya kwa mazazi a maungulo? Kwa Keleke ye ketilwe. Isiñi kwa Babilona, isiñi kwa Sodoma; nebana ni numwana kulo kwani. Kono haili Moya o Kenile kiona Numwana kwa Keleke ye ketilwe, busihu boo, Mulimu yapila mwa mibili wa nama, kuiponisa ili Yena, kuba Mulemuhi, Linzwi le li lemuha milelo ni maikuto a mwa pilu. “Jesu Kreste ki yaswana maabani, kacenu, ni kuyakuile.” Ki yena Jehova-Jaire. U lu bonezi kale Sitabelo, mi usweli wa paka buitamo bwa Hae. Usweli kubuluka bulikani bwa Hae, mwa mazazi a maungulo, ni sicaba.

¹⁵³ Balikani, lwakona kumbombola mo busihu kaufela. Litaba ze bulezwi, ki zeñata ze bulezwi li likani. Kuna ni sicaba mo se si kula; mutokwa foliso. Kiñi ha mu sa lumeli Cwali? Kambe Ni kona kumi folisa, Ne ni ka eza cwalo. Mu lapele. Kambe Ni kona ku mi folisa, Ne ni ka mifolisa. Hanikoni ku mu folisa. Ni... Mu lemuhe, Ni fa sebelezo, busihu bwa pili kamba amabeli, kwanu, lu ka lapelela bakuli. Mi zeo ha ki neku leo fela. Haiba kuna ni Peu ifi kaufela mo yelukiselize kwa Bupilo, Moya o Kenile uka i swala. Ba ka i bona. Ba ka i ziba. Cwale Yena u...

¹⁵⁴ Ki ba bakai mo baba ka nanula mazoho a mina, fapila Mulimu, ni kubulela kuli, “Na lumela cwalo ka pilu yaka kaufela, kuli Jesu Kreste wa swana maabani, kacenu, ni kuyakuile; kuli U zuhile kwa bafu, mi U pila mwahala luna busihu cwana, inza iponahaza ili Yena mwahala luna, mi Na lumela kuli ki Mulimu”? Kikuli mu ka nanula mazoho a mina, ni kubulela kuli, “Na lumela cwalo luli”?

¹⁵⁵ Cwale, Ndate wa Lihalimu, ba mwa mazoho a Hao. Ba mwa... Ba bulela kuli ki bona Peu ya Abrahama. Bona—bona babata, bona—bona babata limbuyoti za Mulimu. Mi cwale Ni ba bulelezi, ka nzila yebunolo, yenyinyani ye. Ni kalile ka tuto yaka, mi ha ni si ka ifeza. Kono, Ndate, bona—bona ba bona fa, mwa kupakiwa kwa Abrahama, mo No pakezi sepiso ku yena, wa mufa tiisezo. Cwale haiba mo—haiba Moya wa Kreste ha u yo ku luna, kona kuli hakuna seluli sona ku Kreste. Mi sibupeho sa Kreste hasikoni ku cinciwa.

¹⁵⁶ Mi U lu bulelezi hande, ni kusepisa lika ze kuya ka Bibele, mwa libaka zeñata. Neba Testamente ya Kale i sepisize cwalo, mwa Malaki 4, kuli kukaba cwalo mwa mazazi a maungulo, "Uka fetula lipilu za bana ku kutela kwa Tumelo ya bashemi," sina bashemi ba Pentekota, Tuto ya makalelo ya Bibele, ili Linzwi la makalelo, kona se Li ka eza. Mi ku kaba sisupo, mi sisupo se si kapaka, si pakiwe ka Linzwi le li si latelela, kuli U teni mo. Mi lwa Ku lumela.

¹⁵⁷ Cwale, Ndate, cwale—cwale Satani ha fumane nzila ya kuzwa ka yona. Halu—Halu lumeli kuli luna ni mata afi kaufela, Mulena. Ha lu buleli kuli luna ni mata. Lu bulela kuli luna ni bundume.

¹⁵⁸ Lu lemuha kuli, mupokola fa mukwakwa, ni kuwani ya hae yeniyinyani yetinilwe kwa toho ya hae. Kwa limota zetuna zani inge litaha mwa makululu a linzila, ka lubilo lo lueza limaili ze nainte fa hola, limota zabuima bwa lipeleza ze mianda yemilalu, haana mataaku yemisa neba alimuñwi wa bona. Nebaka mu luba luba. Kono abonise fela sisupo sani, ni kunanula mazoho a hae, ma mbuleki aka lila ni mataya alile. Ki bundume. Muleneñi kaufela u mwa mulaho wa hae. Una ni bundume, isiñi mata. Hakulata hana bukiti bo bulikana lipaundi ze mwanda, kono una ni bundume.

¹⁵⁹ Mi cwalo kona mo kuinezi busihu boo, Mulena. Lu taha ku Satani, isiñi ka mata, kono ka bundume, kubonisa Mali ni bupaki bwa bulikani. Haana tukelo ya kuswala sicaba se si kula see.

¹⁶⁰ Ku batalimela ni ku babona ha ba ikataza, moo, O Mulimu, haiba kuna ni mukwa omuñwi o Ni kona kuisa Liñusa ku bona! Kambe fela ne ba bona, Mulena, kulemuha fela! Ba zuse, Mulena. Nako yeñwi cwale, busihu boo, haba bone kuli Wena u Mulimu yaswana. Usweli kupaka Linzwi la Hao. U Li buluka fela sina Mo bulelezi. Mwa mazazi a maungulo aa, U bulezi litaba ze kuli li ka ezhahala, "Foo Mwana mutu ha sa bonahalile," kuli litaba ze li ka nga sibaka. Lumeleza cwalo, Mulena, mi ha ba bone kuli ki Wena. Ka Libizo la Jesu, Na lapela. Amen.

¹⁶¹ Cwale mulumele, balikani. Mu sicaba sesinde hakalo. Ni fitelezi fela nako yaka, mwabona, mi Ha—Ha ni sika bata kueza cwalo. Ni ba bulelezi kuli Ni . . . lu ka zwa ka nako, busihu boo, kono Ni palezwi kubuluka cwalo kakuli Ni . . . Mi Ni ka fela tuto yaka kamuso busihu, mwendi, haiba Mulena alata.

¹⁶² Cwale ki luna ba fa. Mina mu sicaba. Kaufela luna lu batu fela mwa mibili. Lu bata kupila. Mañi ni mañi kaufela utabelia kupila mwa nako ya hae. Ni lumela kuli Mulimu wa tabelia kuli lueze cwalo. Na—Na lumela cwalo. Cwale, ha ki kuli hakuna Mulyani mwa Gileadi.

¹⁶³ Mwa ziba, ne ku bulezwi nako yeñwi kuli, “Kikabakalañi, kikabakalañi hakuli cwalo? Ki—ki kuli hakuna mulyani mwa Gileadi nji?”

¹⁶⁴ “Kana hakuna mupolofita mwateni?” Isaya naize, kamba, Ni talusa kuli ki Elia ya na bulezi. “Amuye muyo mubuza, ‘Kana kikuli hakuna mupolofita mwa Isilaele nji? Kiñi hamuya kwa milimu ya Ekroni, milimu ya Baale-zebubi? Kiñi, sikamañi, hamuya kulo kwani?’ Yena kakuba Mujuda, ‘Kiñi ze muyela kwateni?’”

¹⁶⁵ Ali, “Ki kuli hakuna mulyani mwa Gilieadi naa, kana hakuna ñaka mwateni? Ku cwani naa? Kikili kona libaka leo?”

¹⁶⁶ Kikuli kona libaka leo? Batili, Sha. Luna ni Mulyani. Moya o Kenile uteni moo. Eeni, sha. Sepiso ki ya luna. Cwale mu swanelia fela kulumela cwalo. Mina . . .

¹⁶⁷ Ki lizazi leo minahano ya sicaba se i hasani maswe, habana . . . Na ba utwela makeke. Ha ba sa ziba sa kulumela. Yo ubulela se, mi *yo* ubulela *sani*. “Mi linzwi la mutu kaufela libe lishano, mi Aka abe niti,” ki Mulana Mulimu yana bulezi yoo. Yeo ki niti. Cwale Hakoni kucinca sibupeho sa Hae.

¹⁶⁸ Cwale, Ni lumela kuli maabani busihu nelukalile ka kadi ya tapelo ya wani (nji nesi cwalo?), ni kubiza kuisa mwendi fa twenty, kamba nto yeñwi cwalo. Huh? Ha lu cinceni fela muzamao woo. Lusike lwaba ni kadi ya tapelo ifi kaufela ni yekana. Eeni, mu lapele fela. Mwa ziba, kadi ya tapelo i mi fitisa fela fahalimu faale.

¹⁶⁹ Kono Ni ikutwa Kubateni kwa Hae, kacwalo Ni ziba fela kuli Umwateni moo. Ki ba bakai babakile babona fateni siswaniso sa Lingeloi la Mulena lani? Kacwalo amuni tuse, ha Ni ka yo mi katanyeza kwa Katulo, Haliyo kwahule nina ka liñokolwa zepeli kuzwa fo Ni yemi faa. Yeo ki niti. Liteni faa.

¹⁷⁰ Cwale yasina kadi ya tapelo, nanula lizoho la hao, ubulele kuli, “Hanina kadi ya tapelo, kono niteni Na kula mi ni tokwile.” Kihande, ki kwa sibaka kaufela. Ku lukile.

¹⁷¹ Cwale Ni ka mi bulelela. Ne li ezize sikamañi Lingeloi lani fahalimu faani? Na fetulezi mukokoto wa Hae, mi mukokoto wa Hae no fulalezi ku Abrahama. Ili, zene Ni ka fita ku zona, busihu boo, kono ni palezwi kueza cwalo. Ni fa Na bulezi kuli, “Ikaba nto yeswana ni fa kutaha kwa Mulena, sina mo ne kuinezi Sodoma.” Lu fumana kuli, Na fulalezi mukokoto wa Hae kwa tende. Mi Sarah aseha za Na bulela, kakuli Na mu bulezi. Mi na sa utwisisi sani kuli, yena kakuba fela Mutu kwani, inza ca nama ya na halikile, kunwa mabisí a komu, ni kuca namani yateni, mi yani neli Mulimu.

¹⁷² Bibebe ibulezi kuli neli cwalo. Abrahama nabulezi kuli nekuli cwalo, “Elohim.” Yeo ki niti. “Elohim,” *Mulimu*. Alikela

fapila Abrahama. Mi, “Mulimu,” a Mubiza kuli, “Mulena Mulimu, Elohim, Yena yamata kaufela.”

¹⁷³ “Kwa simuluho,” linzwi leliswana li itusisizwe. Muituti kaufela uziba cwalo. “Kwa simuluho *Mulimu*,” mutualime Siheberu, “Elohim.”

¹⁷⁴ Mutualime fani Abrahama hanaize, “Mulena Mulimu, Elohim,” Muuna yaswana, Mutu yaswana, kubonisa kuli Mulimu naka iponahaza ili Yena mwa nama ya butu, kwa Peu ya Abrahama, kuli apake bulikani, ni kueza lika zeswana za Na ezize, (mwabona kana?) kinto yeswana ya Na ezize kwani. Yena kamita ki mupolofita ya lemuha milelo ni maikuto a mwa pilu. Kakuli, ki ba bakai babaziba kuli Bibebe ibulela cwalo, “Linzwi la Mulimu li lemuha milelo ya mwa pilu”? [Kopano ili, “Amen.”—Mu.]

¹⁷⁵ Cwale haiba Mulimu ukanga mbwesha batu ba balalu mwahali mo, busihu cwana. Cwale yeo kona taba. Haiba kuna ni ya sa nahani cwalo, taha ueze cwalo. Haiba haba ezi cwalo, hakuna se ba bulela ka sona. Mwabona? Cwale, mulemuhe, kunga mbwesha batu ba babalu, (kuna ni bupaki), babali baeniyi luli, mi haiba Moya o Kenile... Haiba mu ka lumela fela, kona fela ze Ni kupa ku mina kuli mulumele, ku eza, ki kulumela kuli *ye* Bibebe ki yona Niti, mi lupila mwa mazazi a maungulo, mi ye kona sepiso ya mazazi a maungulo.

¹⁷⁶ Muhupule, Abrahama, kamba hakuna ni usili, nasika bona sisupo sifi kaufela konji Mwana wa sepiso yana ti lo taha. Abrahama abona mifuta kaufela ya lisupo ni lika, kufita fani, kono sani neli sisupo sa mafelelezo. Haana ku si fosa; zwelopili ya Mulimu. Peu ya Abrahama, sani kona sisupo sa bona mafelelezo. Mwabona? Sani neli sa mafelelezo. Mulimu! Na zibile, kuzwa ona fani, kuli neli yena Elohim. Mi Jesu akuta hape ni kubulela kuli kukaba ona cwalo, mi fa kona fo luinzi kacenu tenyene, kinto yeswana.

¹⁷⁷ Sicaba, ye ki Niti. Na ziba, “Ona mwa muyaho nyana woo?” mwa bulela. Kihande, kona mo kubezi ona cwalo. Na pepezwi mwa sicelo. Nekusina yana kona ku Mu lumela. Kono ona Peu ye ne kona kulumela yani, ye lukiselizwe kwa Bupilo, kona lika kaufela. “Kaufela ba Ni file Ndete baka taha ku Na.” Yeo ki niti. Musike mwa bilaela, zeo; libizo la bona liteni, baka li bona. Mi ka mukwa o cwani? Ba ka eza cwalo.

¹⁷⁸ Cwale, mwabona, ki mulelo fela, Ne—Ne ni ka lapela ni kumibeya mazoho. Ni ka bulela fa litaba zeo, sihulu la Sunda musihali. Kono Ni—Ni bata kuli mubone kuli mwakona kubeya mazoho a mina ku Yena. “Ki yena Muprisita Yomutuna ya kona ku swaliwa ka maikuto a matuku a luna.” Kana mwa lumela cwalo? [Kopano ili, “Amen.”—Mu.] Mwa lumela. Mi cwale haiba Uka eza cwalo... .

¹⁷⁹ Ni—Ni ziba mutu yomuñwi mwahali moo. Ha ni talimile, mi Ni boni bababeli kamba ba balalu ba balikani baka babainzi fani, yani ki mukutazi, bababeli ba bona fani. Mi alimuñwi uinamisize toho ya hae, Mulena kona amano folisa fela mushimani wa hae, kwa kulyangana mwa booko, ibo, kacenu, na ni lizelize luwaile.

¹⁸⁰ Ni—ni muuna yomuñwi fani, ni mbututu wa hae yomunyinyani, busihu bobuñwi, ne ba hupula kuli na shwile. Mi Ne nili kwa Beaumont. Mi luna, lwa biza, lwaya kwani, mi a ni beya mazoho, akala kulila, ali, “Muzwale Branham, Linzwi la Mulena lina ni wena. Aku Mu kupe fela.” Ka ona muzuzu wani luli, mbututu yomunyinyani akuta kwa bupilo, mi akala kupila hape. Ki yani ndatahe yainzi fani, ki mukutazi.

¹⁸¹ Mi muuna yoo, mota ne ipindumukile, ni ku mu nepela mwa sika kamba ze cwalo, mi ayokena mwa musima, mi za lyanganisa booko bwa hae bobunyinyani, ni lika zeñwi. Mulena amu folisa, uicketile hande. Ba lumezi. Bona kaniti . . .

¹⁸² Cwale musike mwa bulela kuli Ni ezize. Na hakuna ze ni ezize kwateni. Tumelo yabona ku Mulimu, kona ye li ezize. Muna ni tumelo! Kaufela . . .

¹⁸³ Jesu naize, ku Muhalalehi Mareka 11:22, “Taba kaufela! Ha mu ka bulelela lilundu leo kuli, ‘Zwa fa,’ mi mu sa bilaeli mwa pilu, kono mulumela kuli se mubuleli si ka ezahala, mwakona kuba ni se mu kupile.” Kono ki zeo foo, mwabona. Ha ki sepo; ki “kuziba cwalo.”

¹⁸⁴ Mi haiba Wakona ku Iponahaza kuli wa pila, yena ya Na file sepiso wakona ku Iponisa kuli wapila, mi hakuna sika mwa lifasi sesikona kueza cwalo. Mu zuhe! Amu inyunge ilimina, ka kutiya, moyo wa mina. Mwabona? Hakuna sika mwa lifasi se si kona kueza cwalo kwanda Mulimu.

¹⁸⁵ Cwale mwakona ku—mwakona kuatula ka bumaswe, haiba mubata kueza cwalo. Neba Mu atula ka bumaswe, kona kuli ba sa kona kuatula Moya wa Hae ka bumaswe. Ba li, “Na li diabolosi, yana eza cwalo.” Kihande, kakuli, ne ba amuhezi mupuzo wani.

¹⁸⁶ Mu lumele fela. Hamukoni kufolisa. Hanikoni kufolisa. Hakuna mutu yakona kufolisa. Mulimu ki yena mufolisi.

¹⁸⁷ Kono haiba mukona fela kulemuha kuli Yena luli yemu sebeleza, mi ya mi kauhanyize kwa kusebeleza lifasi, Yena luli yo Mu lata; Yena luli ya ka yo yema mwa Katulo, mina mwa Katulo ni Yena, ku yo atulwa, haiba Pata ya Hae ikona kutaha ona fa ni kubonisa kuli Utensi faa!

¹⁸⁸ Cwale mibili wa Hae wa nama haukonu kueza cwalo. Zeo halitaha, nako se ifelile. “Sina lubya ha lu bonahalela kwa Upa mane kuyofita kwa Wiko, ki mo ku ka bela ni kutaha kwa Mwana mutu.” Kono, Moya wa Hae!

¹⁸⁹ Mi ni Keleke itile, amutalime mo i tahezi; ka kutapiswa, kukaniswa, kolobezo ya Moya o Kenile; mi cwale ni kukena mwa nako ya kuungelwa, kuli i lukise Keleke. Ona cwalo fela mo ne i sepiselize, ona cwalo fela Masika a Likeleke mwa tomezwi, mi luboni zeo, lika kaufela litaha ka kushetumuka, ni kushetumuka.

¹⁹⁰ Pentekota kona kopano ya mafelelezo. Zeo ki kuya ka Mañolo. Ikaba kopano ya mafelelezo, ye hanilwe ni babañwi ba yona, yeo ki niti, kuba kopano. Hakuna kopano ye amuhelwa ku Mulimu. Ki...Ki batu ufi ni ufi, kona baba amuhelwa ku Mulimu.

¹⁹¹ Cwale kikuli hamukoni kulumela Kubateni kwa Hae? Cwale fa, Na ni muzwale wa mina fela, mi cwale ni lumilwe fela, kuli Mulimu u ni bulelezi kutaha ku to eza se. Kabakaleo, Na Mu lumela. Mi haiba ne ku si ka ñolwa mwa Linzwi, kwa lusika loo, Ne ni ka zwa ku zona. Sika kaufela se si siyo mwa Linzwi, Ha ni si lumeli. Ha—Ha ni koni ku si amuhela. Ha ni buleli kuli Ha ni koni ku si lumela, kono Ha ni si amuheli; Ha ni si utwisisi. Kono haiba si mwa Linzwi, mi ili sepiso ya lusika loo, Na i utwisia. Mina boo? [Kopano ili, “Amen.”—Mu.] Mi Mulena alu tuse cwale. Mina fela cwale... Amu pahame cwale, ka tumelo, mulumele kuli mwa... kubateni kwa luna... Lu fapila Kubateni kwa Hae, nitaluse, cwale, yena Jesu yaswana yana file sepiso yani.

¹⁹² Mi mwa Bibebe moo, Paulusi ya susumelizwe, yana bile ni sinulo mwa butuna cwalo kufitela aba ya ikalelwa kukatala, “Mi aba ni butuku mwa mubili, konji ha yo pahamiswa fahalimwa buñata bwa sinulo.” Mwabona, na ñozi Bibebe, na li ya susumelizwe hahulu. Añola Libuka za Bibebe. Sina Mushe, nali mupolofita. Kacwalo yena, Linzwi la taha ku yena, mi a Li ñola, mi la lumelezwa mwa Mañolo, ili Litaku zekenile. Cwale neli yena yana—yana—yana bulela kuli... kulumela cwalo, yana lutile lika zee.

¹⁹³ Cwale muhupule kuli Kreste u zuhile kwa bafu mi u mwahala luna. Mi mube ni zeo mwa minahano ya mina, Kreste u zuhile kwa bafu mi u mwahala luna.

¹⁹⁴ Cwale, luboni mifuta kaufela ya mizamao yemituna, ni kuhuwa ni kulumba Mulimu; kaufela ki zende. Lu bulezi ka malimi ni kupolofita, ni lika kaufela. Luboni zeo kaufela. Kaufela ki zende. Zeo litahile hamoho ni Zona.

¹⁹⁵ Kono, muhupule, nto ya mafelelezo ki Kubateni kwa Pata ya Hae, ili lona Linzwi Kasibili. Ki yena Linzwi. Toho, Linzwi, I taha kwa Mubili. Mwabona? Mi cwale Linzwi leo, mwa Maheberu kauhanyo ya 4, iize, “Linzwi la Mulimu li buhali, kwa mata lifita mukwale olozizwe kafa ni kafa, mi li lemuha milelo ni maikuto a mwa pilu.” Cwale munge Liñolo leo ni kulikutisa kwa mulaho kwa simuluho ya bapolofita, mu li batisise hande

kushetumuka kuya ku Jesu Kreste, mi mubene haiba ha ki nto yeswana, ki nto yeswana, kuli Yena uzibwa ka kuba Mesia.

¹⁹⁶ Cwale ha ki mutu usili fela fa yali Mesia. Ki Moya o Kenile kona oli Mesia. Kreste ni Moya o Kenile ki nto yeswana, kacwalo ki Wo fa cwale usebeza mwa nama, unza lukisa Mubili hande kwa muhau wa kuungelwa. Mulumele cwalo, balikani.

Mulena Mulimu, shangwe ha li ezahale.

¹⁹⁷ Cwale ka Libizo la Jesu Kreste, Ni beya moya kaufela oli mwa sibaka se mwataso zamaiso yaka, kwa kanya ya Mulimu. Ni bulela cwalo kuli mu utwisise. Mwabona, musike shangwe . . .

¹⁹⁸ Haiba wa kakanya, wena—wena, ha ki nto yende kuina nako yetelele, kakuli batu babañata bateni moo, hakuna kukakanya, ba boni se si ezahalanga linako zeñwi ku baba sa lumeli. Sika zwa ku yo kukena ku yomuñwi, sina mo ne kuinezi mwa Bibele.

¹⁹⁹ Ki ba bakai ba mina mwahali mo baba lapela, baba ziba kuli ni muenyi, mi ni sa zibi sika ka mina? Amu nanule mazoho amina, kuli mwa lapela, kuli muzibe kuli Ha ni zibi sika ka mina.

²⁰⁰ Wena, muuna yainzi fani yani ya itamile liyebela le linsu, yasweli ku ni lubukela foo.

²⁰¹ Cwale talima. Wabona Liseli leo nji? Kana ha u Li boni nji? Le li fubelu cwalo, Liseli la mubala wa bufubelu ni butala cwalo fafasi faa.

²⁰² Wa ni lumela kuba mutanga Hae, sha? Haiba Mulimu ukona kupatulula ku na butata bwa hao, kana wa lumela, no ka ni lumela ka pilu ya hao kaufela, no ka lumela kuli ki Mulimu? Kikuli no ka eza cwalo? Kikuli no ka lumela kuli foliso ya hao itile? Una ni kadi ya tapelo nji? Batili, hauna yona. Ha u i tokwi. Butata bwa hao bu mwa zebe. Haiba yeo ki niti, nanula lizoho la hao. Neli mwa zebe ya hao; hakusana cwale, haiba u lumela cwalo. Ha ni mu zibi muuna yoo, nali kuba ni mubone.

²⁰³ Cwale ki yo fa muuna yainezi bukaufi ni wena. U sweli wa lapela cwalo. U sweli kulapelela nto yeñwi ye fosahalile ni yena. Amu ni talime, sha. Una ni kadi ya tapelo nji? [Muzwale uli, "Batili."—Mu.] Ha una. Wa ni lumela kuba mutanga Mulimu naa? ["Eeni."] Wa lumela se Ni ku bulelezi, kuli ki Niti? ["Eeni, sha."] Wa lumela kuli ki Pata ya Jesu Kreste? ["Eeni, sha."] U lumela kuli mukokoto wa hao ukaba hande kuzwa cwale kuya kwapili? Wa lumela? Nanula lizoho la hao. Hauba u ka lumela! Mwabona?

²⁰⁴ Cwale buza muuna yoo. Na li kuba ni mubone fateni mwa bupilo bwaka. Ali kuba a ni swale. Uinezi kwahule liñokolwa ze mashumi amabeli kuzwa kuna. U sweli sikamañi? Seo sitaleleza Mañolo. U sweli Muprisita Yomuhulu. Na inzi fani, inza lapela kuli afoliswe. Mwabona, u sweli Muprisita Yomuhulu yakona kuswaliwa ka maikuto a makulano a luna. Mwabona?

²⁰⁵ Cwale, u nahana sikamañi, mucaha yainezi kwa mulaho koo, mutangana yasweli ku ni lubukela kunongana nina foo?

Kikuli ulumela kuli Mulimu ufolisize butata bwa lipiyo bone bu unani? Wa lumela? Nanula lizoho la hao, haiba wa lumela. Ubata kutuhela mukwa onani wo, hape, kuyumba kwai ya hao yeo? Nyanganyisa lizoho la hao sina *cwana* haiba wa lumela. Cwale liwisefafasi mi ulibale ka zona. Jesu Kreste u ku folisize. Haiba fela ukona kulumela!

²⁰⁶ Kuzwa fela kuwena foo, kuna ni kalibe yainzi ni magilasi kwa meeto. U katazwa ki butata bwa kuikalelwa. Kana u lumela kuli Mulimu uka ku folisa, kalibe? Nanula lizoho la hao haiba u lumela cwalo. Ku lukile.

²⁰⁷ Kana uka ni eza ka sishemo? Kuna ni kalibe yomunyinyani yainezi bukaufi ni wena, ukatazwa ki butata bwa sisali, butata bwa basali. Yeo ki niti, kalibe. Nanula lizoho la hao, haiba ku cwalo. Drainage. Beya lizoho la hao ku yena, kuli abe hande, kakuli wa lumela.

²⁰⁸ Uli, mi uinele bukaufi ni yena, alimuñwi, bababeli, fani Li inzi fahalimwa kalibe yomuñwi yainezi bukaufi ni yena. Ukatazwa ki mahutu, una ni butuku bwa mahutu. U lumela kuli Mulimu uka folisa mahutu a hao naa? Nanula lizoho la hao. Ki fo he cwale. Mwabona?

²⁰⁹ Mwa Mu lumela kuba Jesu Kreste yaswana maabani, kacenu ni kuyakuile? [Kopano ili, “Amen.”—Mu.]

²¹⁰ Wa lumela, wena yainzi kwa mulaho koo? Kwa mulaho wa muuna yainzi kwa pata kwanu, kalibe yainezi *fad*? Kana u lumela kuli Mulimu... Una ni lika zepeli ze maswe cwale. Iliñwi ya zona ki kansa; haili yeñwi, ki kuopa mwa lingongo. U lumela kuli Mulimu uka kufolisa? Haiba u lumela cwalo, nanula lizoho la hao uli, “Na—Na lumela.” Ku lukile, lumela.

Kana wa lumela? U sweli kutiisa bulikani.

²¹¹ Ki yo fa kalibe yainzi inza ni talimela, kwa mulaho fela wa muuna yoo. U tinile ndelesi yefubelu ibonahala cwalo. Yefubelu, kwahalimu *kwaa*; ki sweta, yakona kuba cwalo. U inezi kwahule hahulu; kuna ni lififi kwale. Kasamulaho, mwabona, seo si kueza hahulu kufokola, nto kaufela ikala fela kufetuha mwa mubala wa mabisu mwahala muzuzu.

²¹² Mane, ki Lani liyemi fani, fahalimwa hae. Mwabona Liseli lani? U sweli kulapelela nto yeñwi. Haiba Jesu Kreste uka patulula kuna so sweli kulapelela, kikuli uka lumela ka pilu ya hao kaufela? Uka lumela nji? Na ni muenyi ku wena, ni wena u muenyi kuna. Kono u ngunyutilwe ki Muprisita Yomuhulu, kakuli ponahazo ya Ni fanga ilulile fahalimwa hao, wabona, wabona, sisupo. Na ziba ki sona.

²¹³ Una ni kuikalelwa kokutuna hahulu kona zo kula. Mi hape una ni kolu fa mumizo, yosweli kukatazeha ka yona. Haiba yeo ki niti, nanula lizoho la hao.

U li, “Wakona kubona sani.”

²¹⁴ Ku lukile, aku tahe...Ha u zweleli kwanu. U zwa...Ha u zwi mwa naha yee, sibaka see. Uzwelela kwa Memphis. Yeo ki niti.

²¹⁵ Kalibe yainezi bukaufi ni wena, ni yena uweweleta kwa Memphis. Kikuli ulumela ka pilu ya hao kaufela, kalibe? U lumela kuli Mulimu wakona ku ku folisa? U ni lumela kuba mupolofita wa Hae, kamba mutanga Hae? Seo sa sitatalisanga sicaba, mwabona. U ni lumela kuba mutanga Hae? U lumela kuli ki Mulimu ki yena yasweli kubulela zeo? U ziba kuli Hani koni kuziba sika ka wena. U lumela kuli ikona kuba Mulimu kanti? Ku lukile. U lumele ka pilu ya hao kaufela. Mi unani, so sweli kukula, una ni...una ni butata ni mumizo wa hao, hape. Mi nto yeñwi hape, una ni kasolondo, kaka ku melile kwa makupo. Kikuli u lumela kuli Mulimu wakona ku ni bulelela neku la makupo ko ka melezi? Haiba ku cwalo, nanula lizoho la hao haiba Ni ku bulelela niti. Ki kwa neku la bulyo. Mwabona? Mwabona? U lumela kuli Mulimu wakona ku ni bulelela yo uli yena? Kana zeo li ka kutusa nji? Ki wena musala Bo. Cox. Yeo ki niti. Mwabona? Icke, mwabona.

²¹⁶ Kana mwa lumela? Kaufela mina mwa lumela cwale? [Kopano ya nyakalala ni kubulela kuli, “Amen.”—Mu.] Mwabona, yeo kona tiisezo ya bulikani kwa Peu ya Abrahama, haiba ukona kulumela! Mwabona?

²¹⁷ Fa, kuna ni musali wa mwanana ya lobezi fa kambeta. Wa ni utwa nji, kalibe, wena ya lobezi fa kambeta kao? Eehe. Hanikoni ku kufolisa. Hakuna ze Ni ziba ka wena; wena u muenyi fela ku na. Kono kana u lumela kuli Jesu Kreste wakona ku patulula ku na seo butata bwa hao buli sona? Kikuli seo si ka kutusa nji? Kana, si ka ku tusa? Haiba u lobala foo, u ka shwa. Una ni fela kolo iliñwi ya kupila, yeo ki kuamuhela Kreste. Una ni kansa. Yeo ki niti. U lumela kuli Mulimu uka ku folisa cwale? Wa lumela? Nanula lizoho la hao haiba u lumela cwalo. Ku lukile. Mwa sibaka sa hao, nto inosi fela yokona kueza, ki kuzuha fa mumbeta foo; ni kunanula fo lobezi foo, ni kuya kwa ndu, unzo bulela tumelo ya hao ku Mulimu, kakuba Peu ya Abrahama. Nanuha, ka Libizo la Jesu.

Mwabona, wa nanuha, kuli ange sepiso ya hae ku Mulimu.

²¹⁸ Ki ba bakai ba mina baba siyezi baba lumela ka lipilu za mina kaufela cwale?

²¹⁹ Aku yeme. Una ni mata; Mulimu uka kufa mata. Yema, ka mahutu a hao. Ki yani fani, uyemi, kuzwa fa mumbeta.

²²⁰ Cwale mina ba bañwi baba bata ku amuhela Jesu Kreste, amu yeme. Amu yeme. Amuyeme, kai kaufela, mu amuhele Jesu Kreste kuba mufolisi wa mina.

²²¹ Mulena Jesu, folisa mañi ni mañi wa bona. Lumeleza cwalo, Mulena.



JEHOVA-JAIRE 1 LOZ64-0402

(Jehovah-Jireh¹)

Liñusa le ka Muzwale William Marion Branham, neli katalizwe lwa pili mwa Sikuwa la Bune manzibwana, Lungu 2, 1964, ili fa 4-H Club Barn mwa Louisville, Mississippi, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org